

四庫全書

經部

欽定四庫全書

經部

周禮集說卷五

詳校官監察御史臣邱大愷

刑部郎中_臣許兆椿覆勘

總校官庶吉士臣何思鈞

校對官中書_臣石鴻緒

謄錄貢生_臣戈廷模

欽定四庫全書

周禮集說卷五

大司樂中大夫二人樂師下大夫四人上士八人下士十有六人府四人史八人胥八人徒八十人

鄭氏曰大司樂樂官之長疏曰宗伯主禮大司樂主樂禮樂相將是故列職於此樂師與大司樂職別而同府史亦謂別職同官

大司樂掌成均之灋以治建國之學政而合國之子弟

馬允有道者有德者使教焉死則以為樂祖祭於瞽宗
以樂德教國子中和祗庸孝友以樂語教國子興道諷
誦言語以樂舞教國子舞雲門大卷大咸大磬大夏大
濩大武

瞽音古興許應反卷音
權瞽上昭反濩戶故反

鄭氏曰成均之法成均五帝學也其遺禮可法者文
王世子曰於成均以及取爵於上尊然則周人立此
學之宮 疏曰建立也周人以成均之法式以立國
之學政而合聚國之子弟將以此教之 鄭氏曰國

之子弟公卿大夫之子弟 疏曰王制曰王太子公卿大夫元士之適子國之俊選皆造焉 雜說周禮全不說太子惟諸子說一句其他只說國子庶子子弟蓋古者太子入學則以齒論大司樂便是教太子官 雜說教國子自有一項官自大司樂以下許多人不別置一所在都在裏內與國子弟共處故教之以樂所以蕩滌其志慮自然入善中來司樂一項官專教子弟意極深長大抵先王思慮最遠國子弟與

國家相終始既與他父兄共維持而今天下到得子
孫時它子弟亦與之共維持天下子弟善見得後日
子孫天下必治若不善便見得後日天下不會治血
脉關節常相聯絡不可不早思慮也 鄭司農云有
道者有德者使教焉死則以為樂祖祭於瞽宗明堂
位瞽宗殷學也泮宮周學也以此觀之祭於學宮中
疏曰文王世子曰禮在瞽宗書在上庠 陳氏曰
四代之學虞則上庠下庠夏則東序西序南序右學

左學周則東膠虞庠而周則又有辟雍成均瞽宗之名則上庠東序右學虞庠大學也故國老於之養焉下庠西序左學虞庠小學也故庶老於之養焉記曰天子設四學蓋周制也周之辟雍則成均也東膠則東序也瞽宗則右學也蓋辟明也雍和也所以明和天下以其明之以法和之以道則曰辟雍以其成其虧均其過不及則曰成均以習射事則曰序以糾德行則曰膠以樂祖在焉則曰瞽宗以居右焉則曰右

學蓋周之學成均居中其左東序右瞽宗此大學也
虞序在國之西郊則小學也夫諸侯之學小學在內
大學在外故王制言小學在公宮南之左大學在郊
以其選士由內以升於外然後達于京故也天子之
學小學居外大學居內故文王世子言凡語于郊然
後於成均取爵於上尊以其選士由外以升於內然
後達于朝故也東萊曰成均五帝之學以五帝之
學政建國之學政合國之子弟而教之自舜夔典樂

教胄子以此知五帝之教政無不自樂始所以舜命以典樂必兼教胄子之事成周之學皆以掌樂之官司之古人唯陶冶之功最深動盪鼓舞優游浹洽使自得之自舜與周皆是以典樂之官兼教導之事五帝成均之法雖不可見觀舜命夔典樂教胄子一章大略可見漢大常典樂而兼教育之任亦此意歟治建國之學政大司樂既司之又說有道者有德者使教焉以後世私心觀之大司樂既掌學政何必延請

有道德者使之教惟先王之時人推至公之心大司
樂固自可以教國之子弟有餘猶退然不敢自足反
選有道者有德者尊敬事之以使之教國之子弟自
若無能者以此見古人心至公義理之無窮規模之
無疆界大抵設教受教當知無窮意思若死則配食
於樂祖祭於學校使天下常不忘所謂君子以教思
無窮者也蓋不特是時尊師敬長之義使國之慎終
追遠民德歸厚亦是當時有道德者教之入人之深

當時設教有時雨化之者人自不能已大抵周官叙
事之法簡而有餘當時死為樂祖祭於瞽宗其選擇
之精可知以樂德教國子中和祇庸孝友此所謂教
人條目金石絲竹匏土革木是樂之物而已非樂之
德樂德非有道有德者不能知之且如蓍人徒見得
莖大叢百而已湏知得蓍之德圓而神卦人徒見得
陽奇陰耦而已湏知得卦之德方以知人徒知樂之
物湏當知樂之德禮以教中樂以教和樂則導和可

也如何兼中言之所謂陰陽剛柔仁義靡不相備樂
雖主在和無相奪倫豈不是中且如乾剛坤柔乾固
是剛坤固是柔然坤至柔而動也剛何嘗做兩段禮
樂看得中和不可相離然又不可混然無別正如坤
固是動也剛又須知乾主乎剛坤主乎柔中舊說以
中為忠信之忠才改一字便是看不得中和分明一
个中字其義無窮祇肅然祇敬之謂也庸流通日用
常行之謂也孝友見於事親從兄之間者皆所謂樂

之德論中和固是樂之本所謂祇庸孝友就樂中說其端亦可見一个節奏各有條理使之肅然祇敬祇之端也條暢流通庸之端也易直子諒之心使人事親從兄之際油然而生孝友之端也此所謂樂之德以樂語教國子興道諷誦言語樂語非特誦樂音歌詩章凡是教導之間以樂之語教此便謂之樂語大抵後世成周之學政不傳所讀不過章句而已意思趣迫都無生意為是以樂之理見於言語之間便有

感發人處興者託物引類感發興起也道者從容和緩中和教導之意也諷者先儒所謂倍文曰諷也頌者以聲節之曰頌也言語所謂食不語寢不言相酬酢謂之語獨自說謂之言從容和緩優游感發所謂樂之語以樂舞教國子舞雲門大卷大咸大磬大夏大濩大武古人自幼成童舞象古之教人非獨善於口耳必教之以動容周旋舞時屈伸綴兆四支百體發揚蹈厲無非至理存焉所以深感發之何故四支

百體屈伸俯仰皆是入德之門先王之舞皆不徒然
雲門大卷黃帝之舞也大咸堯之舞也大磬舜之舞
也大夏禹之舞也大濩湯之舞也大武武王之舞也
舞之屈伸綴兆先王不言之教在其中所謂四體不
言而喻其理蓋精微矣 薛圖曰周所以用六代之樂
者存三恪與二代也三恪謂黃帝堯舜之後二代謂
夏商之後樂記曰封黃帝之後於蓊以下是也周人
既法其法故兼用其樂也

劉氏曰以前聖世代既殊然其樂皆出於中和而本

諸天地者也

陳氏曰舞有大有小大司樂以舞教國子此大舞也樂師教國子小舞此小舞也大夏以上其執以羽籥文舞也大濩以下其執以干戚武舞也

伊川曰樂舞所以舒其情性也古人為學自入小學以至大學舞勺舞象有弦歌以養其耳有干羽以養其血氣有禮義以養其心如此則非僻之心無自而入 陳氏曰周之時干戈羽籥在東序絃誦與禮在瞽宗書在上庠以言學者之事始于書立于禮成于

樂而舞又樂之成焉故大司樂言樂德樂語而終於
樂舞樂師言樂成告備而終於皐舞孟子仁義禮樂
之實而終於不知手之舞之記曰詩言志歌咏聲而
終於舞動容春秋時季札歷觀樂歌然後及於象武
韶夏之舞舞之始也發於所樂之極其用也常在諸
樂之後此舞所以為樂之成也由小學之書以進於
瞽宗之禮樂由瞽宗之禮樂而成之以東序之舞則
周之教法可知矣

以六律六同五聲八音六舞大合樂以致鬼神示以和
邦國以諧萬民以安賓客以說遠人以作動物

說音悅

鄭氏曰六律合陽聲者也六同合陰聲者也此十二
者以銅為管轉而相生黃鍾為首其長九寸各因而
三分之上生者益一分下生者去一焉國語曰律所
以立均出度也古之神瞽考中聲而量之以制度律
均鍾言以中聲定律以律立鍾之均 疏曰陽生陰
曰下陰生陽曰上黃鍾三分損一下生林鍾三分林

鍾益一上生大簇三分大簇損一下生南呂三分南
呂益一上生姑洗三分姑洗損一下分應鍾三分應
鍾益一上生蕤賓三分蕤賓損一下生大呂三分大
呂益一上生夷則三分夷則損一下生夾鍾三分夾
鍾益一上生無射三分無射損一下生中呂陰陽相
生自黃鍾始也 劉氏曰日者太陽之精凡天之氣
以日為主焉月者太陰之精凡地之氣以月為主焉
日行遲三百六十有六日乃一周天月行疾二十有

九日半強乃一周天月一周天常與日會所會之次在天則為十二舍在地則為十二辰故日月會於上則陰陽合於下上下交合者十有二而歲功成焉四時備焉萬物生焉此陰陽會行日月交會以定寒暑而成變化者也小雪之節日月會於娵訾在地為亥其氣之合曰應鍾也冬至之節日月會於玄枵在地為子其氣之合曰黃鍾也大寒之節日月會於星紀在地為丑其氣之合曰大呂也雨水之節日月會於

析木之津在地曰寅其氣之合曰大族也春分之節
日月會於大火在地為卯其氣之合曰園鍾也穀雨
之節日月會於壽星在地曰辰其氣之合曰姑洗也
小滿之節日月會於鶉尾在地為巳其氣之合曰仲
呂也夏至之節日月會於鶉火在地為午其氣之合
曰蕤賓也大暑之節日月會於鶉首在地為未其氣
之合曰函鍾也處暑之節日月會於實沈在地為申
其氣之合曰夷則也秋分之節日月會於大梁在地

為酉其氣之合曰南呂也霜降之節日月會於降婁
在地為戌其氣之合曰無射也所謂氣之合者冬至
之節陽氣在地中始生而上長也陰氣在上而始入
于地其深九寸乃與陽合而陽長上通焉故葭灰未
動黃鍾之管九寸中空皆陰氣也冬至而陽生上實
於九寸之空而葭灰動焉夏至之節陰氣自地中始
生而上長也陽氣自上而始入于地其深六寸三分
二釐強乃與陰合而陰長上通焉故葭灰未動蕤賓

之管六寸三分二釐中空皆陽氣也夏至而陰生上實於六寸三分二釐之空而葭灰動焉自陰生至於冬至凡六管之長短者皆陽氣入地之深淺而始與陰合也陰合於陽上進而葭灰飛動者皆其月之中氣也陽生至於夏至凡六管之長短者皆陰氣入地之深淺而始與陽合也陽合於陰上進而葭灰飛動者皆其月之中氣也故日月交會于上以成次則陰陽交合於下以成時取其管以為聲天地之中聲也

取其律以候氣陰陽之和氣也非聖人其能與於此乎
晦庵曰樂律自黃鍾至仲呂皆屬陽自蕤賓至應鍾皆屬陰此是一个大陰陽黃鍾為陽大呂為陰
大族為陽夾鍾為陰每一陽間一陰又是一個小陰
陽自黃鍾至中呂皆下生自蕤賓至應鍾皆上生以
上生下皆三生二以下生上皆三生四又曰十二律
自黃鍾而生黃鍾是最濁之聲其餘漸漸清若定得
黃鍾是入得樂 王氏曰五聲宮商角徵羽八音金

石絲竹匏土革木六舞雲門至大武也。鄭氏曰大
合樂謂徧作六代之樂書曰夔曰憂擊鳴球搏拊琴
瑟以詠祖考來格虞賓在位羣后德讓下管鼂鼓合
止祝歌笙鏞以間鳥獸蹌蹌鳳凰來儀夔又曰於予
擊石拊石百獸率舞庶尹允諧

乃分樂而序之以祭以享以祀乃奏黃鍾歌大呂舞雲
門以祀天神乃奏大簇歌應鍾舞咸池以祭地示乃奏
姑洗歌南呂舞大磬以祀四望乃奏蕤賓歌函鍾舞大

夏以祭山川乃奏夷則歌小呂舞大濩以享先妣乃奏
無射歌夾鍾舞大武以享先祖凡六樂者文之以五聲

播之以八音

大音恭族七豆反蕤人誰反
函胡南反射音亦夾古洽反

王先生曰此一節天地人之次祭也 王介甫曰分

樂而序之以祭以享以祀者分律而序之自黃鍾至
無射分同而序之自大呂至夾鍾分舞而序之自雲
門至大武以祭地祇以享人鬼以祀天神焉 鄭氏
曰分樂謂各用一代之樂 薛氏圖云祭之尊卑凡

有六等故以六代之樂分而用之以六代之樂配十二調而作之一代之樂則用二調所以用二調者還取一陰一陽相對而為之合也 又曰奏者堂下四

縣鍾聲之調歌者堂上琴瑟之音也但一祭之中皆自為二調庭奏者常以陽律為調升歌者常以陰呂為聲欲其相配 鄭氏曰以黃鍾之鍾大呂之聲為均者黃鍾大呂為之合奏之以祀天神尊之也天神五帝及日月星辰也大族陽聲第二應鍾為之合咸

池大咸也地祇神州之神及社稷也姑洗陽聲第三
南呂為之合蕤賓陽聲第四函鍾為之合函鍾一名
林鍾夷則陽聲第五小呂為之合小呂一名中呂先
妣姜嫄也周立廟自后稷為始祖姜嫄特立廟而祭
之謂之閼宮無射陽聲之下也夾鍾為之合夾鍾一
名圜鍾先祖謂先王先公也 劉氏曰六代之樂雖
不同而皆用五聲旋相為宮以成其文也假此八物
之音以播旋相之文則樂成矣 陳氏曰子合於丑

寅合於亥辰合於酉午合於未申合於巳戌合於卯
此皆即其所合者用之也

凡六樂者一變而致羽物及川澤之示再變而致羸物
及山林之示三變而致鱗物及丘陵之示四變而致毛
物及墳衍之示五變而致介物及土示六變而致象物
及天神

介音界

王先生曰此一節謂四方百物之祭也 鄭氏曰此
謂大蜡索鬼神而致百物 李氏曰樂一終謂之變

鄭氏曰六奏樂而禮畢東方之祭則用大族姑洗南方之祭則用蕤賓西方之祭則用夷則無射北方之祭則用黃鍾為均焉每奏有所感致和以來之疏曰一變至六變不同者據難致易致前後而言

王介甫曰羽物輕疾故致之易介物遲重故致之難象物恍惚無形則其致之尤難川澤虛故致之易墳衍實故致之難天神遠人而尊則其致之尤難其餘所致先後其大略如此而已

九樂圜鍾為宮黃鍾為角大族為徵姑洗為羽雷鼓雷
鼗孤竹之管雲和之琴瑟雲門之舞冬日至於地上之
圜丘奏之若樂六變則天神皆降可得而禮矣凡樂以
函鍾為宮大族為角姑洗為徵南宮為羽靈鼓靈鼗孫
竹之管空桑之琴瑟咸池之舞夏日至於澤中之方丘
奏之若樂八變則地示皆出可得而禮矣凡樂黃鍾為
宮大呂為角大族為徵應鍾為羽路鼓路鼗陰竹之管
龍門之琴瑟九德之歌九磬之舞於宗廟之中奏之若

樂九變則人鬼可得而禮矣

徵張里反雷音雷九聲讀為大磬字之誤也

王先生曰此一節天地人之大祭祀下神之樂也下神之樂用一代薦神之樂用六代所謂大合樂陳氏曰先王之於神示求之然後禮禮之然後祀前分樂一節求之之樂也此一節下神之樂也鄭氏之徒惑於讖緯之說皆不可考也薛圖周人制禮吉法之中大祭有三一曰祭天圜丘二曰祭地方澤三曰禘祫宗廟三祭既殊則其樂亦異然此三祭皆謂大

禘之祀也此樂是致神之樂故云作之六變八變九變然後神示鬼皆出降可得而禮也故鄭注先秦是樂以致其神禮之以玉而裸焉然後合樂而祭之明祭時始用六代之樂也 鄭氏曰凡五聲宮之所生濁者為角清者為徵羽此樂無商者祭尚柔商堅剛也 陳氏曰大司樂所序圜鍾為宮黃鍾為角大簇為徵姑洗為羽此律之相次者也函鍾為宮大簇為角姑洗為徵南呂為羽此律之相生者也黃鍾為宮

大呂為角大簇為徵應鍾為羽此律之相合者也

王先生曰圜鍾為陽律之大大簇為陽律之二姑洗為陽律之三相繼者天之道故於天言之大簇下生南呂南呂上生姑洗然先姑洗而後南呂者以相生為言也相生者地之功故於地言之大呂與黃鍾合子丑也應鍾與大簇合寅亥也相合者人之情故於人言之鄭氏曰雷鼓雷鼗八面靈鼓靈鼗六面路鼓路鼗四面孤竹特生者孫竹竹枝根之末生者陰

竹生於山北者 王介甫曰孤竹以陽為奇也孫竹以陰為衆為小也 鄭氏曰雲和空桑龍門皆山名 王氏曰九德六府三事也書云九功惟叙九叙惟歌則以九功之德皆可歌也 王介甫曰九磬者宗廟九變以簫韶九成也 薛圖云乾陽物也坤陰物也冬至祀天於地上之圓丘所謂為高必因丘陵而因天事天也夏日至祭地於澤中之方丘所謂為下必因川澤而因地事地也蓋陽以圓為形其性動

天陽而動故為圓壇而在國南之地以上以祀之陰以
方為體其性靜地陰而靜故為方丘而在國北之澤
中以祀之亦各從其類也 又曰凡樂之變數皆用
其宮之本數為終黃鍾為宮者黃鍾在子子數九故
九變而終夾鍾為宮者夾鍾在卯卯數六故用六變
而畢林鍾為宮者林鍾在未未數八故用八變而止
皆用其數為終也然則凡十二調而作者各用本數
為樂終非獨本數為三也 雜說夫樂天地之和也

鐘鼓箎絃羽籥干戚蓋其器耳屈伸綴兆疾徐蓋其文耳以天地之和寓諸器形諸文以是而祭天則天神可使降以是而祭地則地示可使出以是而祭宗廟則人鬼可禮吾豈聞其聲見其形哉得於想像如在其上如在其左右然後禮行焉易慢之心不起鄙詐之心不作而鬼神享之矣所謂一變致羽物之類亦言其可以感動凡是血氣之類無不應猶其言百獸率舞鳥獸蹯蹯鵲巢可俯而窺之耳胡宏疑之過

矣

凡樂事大祭祀宿縣遂以聲展之王出入則令秦王夏尸出入則令秦肆夏牲出入則令秦昭夏帥國子而舞大饗不入牲其他皆如祭祀大射王出入令秦王夏及射令秦騶虞詔諸侯以弓矢舞王大食三宥皆令秦鍾鼓王師大獻則令秦愷樂凡日月食四鎮五嶽崩大傀異哉諸侯薨令去樂大札大凶大裁大臣死凡國之大憂令弛縣凡建國禁其淫聲過聲凶聲慢聲大喪泣廡

樂器及葬藏樂器亦如之

縣音玄下並同騶例留反宥音又傀音怪札側八反弛式

反氏

王氏曰宿縣祭前之夕列之於筍虞鄭氏曰以聲展之叩聽其聲以知完否王氏曰此先王承大祭致敬之至也鄭氏曰三夏皆樂章名也疏曰凡興舞皆使國之子弟為之鄭氏曰大饗饗賓客也不入牲牲不入亦不奏昭夏也其他皆如祭祀謂王出入賓客出入亦奏王夏肆夏也騶虞樂章名在召南

之卒章王射以騶虞為節 王氏曰王以六耦射三
侯其耦王射者必詔以弓矢舞則以天子之射其節
比於樂而諸侯之舞亦所以應王故也大司樂則詔
其升降揖遜之儀焉儀禮大射命三耦取弓矢有升
降之儀焉者亦以此也膳夫言王日一舉所食者少
牢乃常食也玉藻曰天子日食少牢而朔日大牢謂
之大食者其朔日之食乎 鄭氏曰宥勸也 王氏
曰以樂侑食三侑則三舉矣 鄭司農曰王師大獻

獻捷於祖愷樂獻功之樂春秋傳晉文公敗楚於城濮振旅愷以入于晉鄭氏曰傀猶怪也大怪異哉謂天地竒變去樂藏之也札疫癘也凶凶年也裁水火也弛釋之也 王氏曰允建國禁其淫過凶慢之聲者所以尚中正也淫聲則不正過聲則不中凶聲則不善慢聲則不肅允此皆大司樂之所禁也顏淵問為邦孔子告之以放鄭聲者此也 鄭氏曰泣臨也廡興也臨笙師鑄師之屬興樂器也興謂作之

樂師掌國學之政以教國子小舞凡舞有帔舞有羽舞
皇舞舞有旄舞有干舞有人舞教樂儀行以肆夏趨以
采薺車亦如之環拜以鍾鼓為節凡射王以騶虞為節
諸侯以貍首為節大夫以采蘋為節士以采蘩為節凡
樂掌其序事治其樂政凡國之小事用樂者令奏鍾鼓
凡樂成則告備詔來瞽皐舞及徹帥學士而歌徹令相
饗食諸侯序其樂事令奏鍾鼓令相如祭之儀燕射帥
射夫以弓矢舞樂出入令奏鍾鼓凡軍大獻教愷歌遂

倡之凡喪陳樂器則帥樂官及序哭亦如之凡樂官掌

其政令聽其治訟

帳音弗趨清湏反薺徐私反
頻音頻繁音頻倡息亮反

胡氏曰掌國學之政以教國子小舞者謂小學也古者國子之在懷抱也能食則教以右手能言則教男唯女俞六年教之數與方名七年男女不同席不共食八年出入門戶及即席飲食必後長者九年教之數日之甲子十年出就外傳居宿於外學書計衣不帛襦袴禮帥初朝夕學幼儀請肄簡諒十有三年學

樂誦詩舞勺成童舞象學射御勺者周公告成大武之詩也象者武功告成象舞之詩也遂用二詩播為樂章小舞則用之以為節奏 註曰帔舞析五采繒

也羽舞析羽也皇舞雜五采羽如鳳凰色持以舞旄舞者龍牛之尾干舞者兵舞人舞無所執以手袖為威儀社稷以帔四方以羽旱暵以皇辟雍以旄山川以干宗廟以人

二鄭
註合

疏曰此六舞者即小舞也對

大司樂教雲門以下為大舞 鄭氏曰教王以樂出

入於大寢朝廷之儀行謂大寢之中趨謂於朝廷爾
雅曰堂上謂之行門外謂之趨鄭司農云肆夏采薺
皆樂章名 王氏曰盛德之至非特動容周旋中於
禮而其節文比於樂焉所謂禮樂不可斯湏去身也
則王之進退有可觀之容可則之象矣然則樂師之
所教者教作樂者也鐘師以鐘鼓奏九夏是已夫行
則緩緩則有直而自遂之義故奏肆夏趨則疾疾則
欲齊而整肅焉故奏采薺玉藻曰趨以采薺行則肆

夏先趨而後行者據以外而入內也 黃氏曰四支
之於安佚人之情也樂徇其情惡勞其形不能非禮
勿動而使乘安佚以蹈其舍則無所不至矣而况王
乎天下視儀而動聽唱而應者也先王制禮視有旒
聽有纓言有記動有佩堂上之行門外之趨為之樂
儀以防其肆使聽其聲而其意以誠使顧其體而其
氣以正周旋中規折旋中矩進揖退揚而後鏘鳴之
佩左中角徵右中宮羽君民事物之意在其中焉非

僻之心無自而入是故祭祀朝會師甸封建之時王在五路則其步趨之節責大馭焉五路之上王安佚矣然而顧車之行而聞肆夏之聲則由吾於堂中顧車之趨而聞采薺之聲則由吾於門外王之言動造次無非禮者樂師之所教大馭之所馭與有力焉

陳氏曰夫王食則以樂侑之言則以樂歌之行則以肆夏采薺節之登車則有鸞和以和之然則王之所以言語飲食行趨登車之際無非禮樂也樂以樂之

禮以節之則純和之志不內散而非僻之心無自入焉所謂禮樂不可斯須去身者此也 芸閣呂氏曰先王制禮作樂以養人起居動作多為文章以寓於聲色之間無非所以薰沐漸漬日遷於善而不自知也 王氏曰環拜以鐘鼓為節此賓拜之儀也環拜謂旋列而拜以拜者非一也鼓以作之鐘以止之作止應於鐘鼓則其儀不忒矣凡射王以騶虞為節者騶虞之詩言蒐田以時仁如騶虞則王道成則王以

騶虞為節者樂仁而殺以時也 鄭氏曰騶虞采蘋

采蘩皆樂章名唯貍首在樂記射義曰騶虞者樂官
備也貍首者樂會時也采蘋者樂循法也采蘩者樂
不失職也是故天子以備官為節諸侯以時會為節
卿大夫以循法為節士以不失職為節大射禮曰樂
正命大師曰奏貍首門若一大師不興許諾樂正反
位奏貍首以射貍首魯孫禮記曰射義載貍首之詩
曰魯孫侯氏四正具舉大夫君子凡以庶士小大莫

處御于君所以燕以射則燕則譽言君臣相與盡志

於射以習禮樂則安則譽也是以天子制之而諸侯

務焉

芸閣呂氏曰王者之仁及鳥獸草木皆如騶虞則王道成也以比為節言天子繼天當推夫天

地好生之德也貍首之詩亡矣記有原壤所歌之辭

曰貍首之班然執女手之拳然貍首田之所獲物之至尊者執女手者所以道舊結歡也言君臣相與習

禮結歡奉天子以修朝事故諸侯之射以是為節所以樂其會時也王氏曰夫射者所以觀德也禮樂皆得謂

之德其容必比於禮其節必比於樂此王與諸侯卿

大夫之射所以有樂章以為之節也 雜說射義曰

明乎其節之志以不失其事則功成而德行立 鄭
氏曰序事次序用樂之事也 疏曰凡樂成謂所奏
八音俱作一終則為一成書曰蕭韶九成 鄭氏曰
燕禮曰大師告于樂正曰正歌備是也詔來瞽詔眡
瞭扶瞽者來入也臯之言號告國子當舞者舞也學
士國子也徹者歌雍雍在周頌臣工之什 王氏曰
徹祭必歌雍者其詩曰有來雍雍至止肅肅相維辟
公天子穆穆取其和而敬故也人之情樂於始者或

倦於終篤於敬者或怠於久於祭之終猶且不失其敬與和此誠之至也劉氏曰令相者樂備矣瞽朦當退則令眡瞭以相之鄭司農曰瞽師盲者皆有相道之者故師冕見及階曰階也及席曰席也皆坐曰某在斯某在斯相師之道也鄭氏曰射夫衆耦也劉氏曰樂出入者笙者歌者舞者出入則令奏鐘鼓以聲其出入警其當執事者以為禮之大節也疏曰軍大猷教愷歌則樂師倡道為之王氏曰凡喪

陳樂器陳而不作所謂明器 䟽曰檀弓曰木不成
斲瓦不成味琴瑟張而不平笙竽備而不和是也

鄭氏曰帥樂官往陳之 䟽曰凡樂官謂大胥至司
干

大胥中士四人小胥下士八人府二人史四人徒四十
人

鄭氏曰胥有才知之稱禮記文王世子曰小樂正學
干大胥佐之 䟽曰大胥小胥亦別職同官

大胥掌學士之版以待致諸子春入學舍采合舞秋頒
學合聲以六樂之會正舞位以序出入舞者比樂官展
樂器凡祭祀之用樂者以鼓徵學士序宮中之事

版音
板舍

音釋采讀為菜比鄭
大夫讀為庀杜如字

王氏曰公卿大夫士之子其父兄有爵列於國也故
謂之國子以其衆言之則謂之諸子以其教於學也
則謂之學士其實一也 鄭氏農曰學士卿大夫諸
子在學者版籍也大胥主此籍以待當召聚學舞者

卿大夫之諸子則案此籍以召之也樂律曰卑者之子不得舞宗廟之酎除吏二千石到六百石及關内侯到五大夫子先取適子高七尺以上年二十到年三十顏色和順身體修治者以為舞人與古用卿大夫子同義也李氏曰觀大司樂禁淫過凶慢之聲而舞人又取卿大夫子有中和祇庸孝友之德者是聲與人無不正也聲與人無不正則聞之見之者焉得不正乎鄭氏曰春始以學士入學宮而學之始

入學必釋菜禮先師也菜蘋蘩之屬 藍田呂氏曰
釋菜之禮禮之至簡者也皆不在多品貴其誠也其
用有三每歲春合舞則行之月令云仲春命樂正合
舞舍菜也始入學則行之文王世子云既受器用幣
然後舍菜是也始入學則行之學記云大學始教皮
弁祭菜示其敬道也 雜說周禮大胥春入學舍菜
合舞月令仲春上丁命樂正習舞釋菜文王世子始
立學者既興器用幣然後釋菜不舞不授器乃退儼

于東序一獻無介語可也夫大胥樂正則釋菜舍合舞習舞而文王世子釋菜不舞不授器何也蓋合舞於釋菜之後習舞於釋菜之前者大胥樂正之制也而不舞不授器則舍菜於既興器用幣之餘者此文王世子之制也疏曰頒分也王介甫曰以春始入學未知其分藝之所宜至秋而可知也於是分授以所學鄭氏曰合聲亦等其曲折使應節奏以六樂之會正舞位大同六樂之節奏正其位使相應

也言為大合樂習之以序出入舞者以長幼次之使
出入不紕錯也比樂官次比之也展樂器陳數之也
以鼓徵學士擊鼓以召之也 王氏曰序宮中之事
謂序王宮之中國子之宿衛而學道藝者春秋之所
學各有其序如大胥之所掌是也宮正言比宮中之
衆寡會其什伍而教之道藝則大胥序宮中之事者
如此也

小胥掌學士之徵令而比之觶其不敬者巡舞列而撻

其怠慢者正樂縣之位王宮縣諸侯軒縣卿大夫判縣士特縣辨其聲凡縣鐘磬半為堵全為肆

釡古橫反捷吐達反特本

亦作
植

王氏曰大胥掌學士之版以待致諸子小胥掌學士之徵令而比之比較比其多寡之數凡以贊大胥之事而已 鄭氏曰釡罰爵也詩曰兕觥其觶不敬謂慢期不時至者 劉氏曰罰以示愧耻焉 陳氏曰巡舞列所以肅其慢 鄭氏曰撻猶扶也樂縣謂鐘

磬之屬縣於筓虞鄭司農云宮縣四面縣四面象宮室四面有牆故謂之宮縣軒縣三面其形曲故春秋傳曰請曲縣繁纓以朝諸侯之禮也玄謂軒縣去其南面辟王也判縣左右之合又空北面特縣縣於東方或於階間而已鐘磬者編縣之二八十六枚而在一處謂之堵鐘一堵磬一堵謂之肆半之者謂諸侯之卿大夫士也諸侯之卿大夫半天子之卿大夫西縣鐘東縣磬士亦半天子之士縣磬而已春秋傳曰

歌鐘二肆

大師下大夫二人小師上士四人瞽矇上瞽四十人中
瞽百人下瞽百有六十人眡瞭三百人府四人史八人
胥十有二人徒百有二十人

鄭氏曰凡樂之歌必使瞽矇為焉命其賢智者以為
大師小師晉杜蒯云曠也大師也 雜說大師之職
專在和合樂聲故夫子語大師樂曰始作翕如也縱
之純如也皦如也繹如也以成翕如也故可以召天

地之和非善知音者何能職此哉 王氏曰先王作樂必用瞽者以其聽之審因其材而任焉雖疾不廢也國語曰瞽矇脩聲是已眡之明者謂之瞭瞽矇無所見焉故設三百人以扶工謂之眡瞭而因使掌樂焉

大師掌六律六同以合陰陽之聲陽聲黃鍾大簇姑洗蕤賓夷則無射陰聲大呂應鍾南呂函鍾小呂夾鍾皆文之以五聲宮商角徵羽皆播之以八音金石土革絲

木匏竹教六詩曰風曰賦曰比曰興曰雅曰頌以六德
為之本以六律為之音大祭祀帥瞽登歌令奏擊拊下
管播樂器令奏鼓鞀大饗亦如之大射帥瞽而歌射節
大師執同律以聽軍聲而詔吉凶大喪帥瞽而廞作匱
謚凡國之瞽矇正焉

匏白交反興虛應反鞀讀為道引之引音盾廞故書為淫

疏曰六律為陽六同為陰兩兩相合十二律為六合
陽聲黃鍾大簇等攄左旋言陰聲大呂應鍾等攄右
旋而言 陳氏曰國語曰景王將鑄無射問律於泠

州鳩對曰律所以立均出度也古之神瞽考中聲而
量之以制度律均鍾百官執儀天地人紀之以三平
之以六成於十二天之道也夫六中之色也故名之
黃鍾所以宣養六氣九德也由是第之二曰大簇所
以金奏贊陽出滯也三曰姑洗所以脩潔百物考神
納賓也四曰蕤賓所以安靖神人獻酬交酢也五曰
夷則所以詠歌九則平民無貳也六曰無射所以宣
布哲人之令德示民軌儀也為之六間以揚沈伏而

黜散越也元間大呂明宣物也二間夾鍾出四隙之
細也三間中呂宣中氣也四間林鍾和展百事俾莫
不純肅純恪也五間南呂贊陽秀也六間應鍾均利
器用俾應復也律呂不易無姦物也細鈞有鍾無鐃
昭其大也大鈞有鐃無鍾甚大無鐃鳴其細也大昭
小鳴和之道也和平則久久固則純純明則終終則
復樂所以成政也觀此則十二律之名義略可見矣
鄭氏曰八音金鐃鍾也石磬也土塤也革鼓鼗也絲

琴瑟也木祝歌也匏笙也竹管簫也教六六詩教瞽
矇也 王氏曰一國之事繫一人之本謂之風言天
下之事形四方之風謂之雅美盛德之形容以其成
功告於神明謂之頌三者詩之體也直述其事而陳
之謂之賦以其所類而況之謂之比以其所感發而
比之謂之興三者詩之用也故詩有六義焉 雜說
以德為之本以此知樂乃出於聖人心術之妙 王
氏曰六德中和祗庸孝友也君子之學詩豈徒頌其

空言哉要本之於德而已蓋六德本於情性所以主
於中六律稽諸度數所以正於外以六德為之本故
雖變猶止乎禮義以六律為之音則書所謂聲依永
律和聲鄭氏曰鄭司農云登歌歌者在堂也樂或
當擊或當拊玄謂拊形如鼓以韋為之著之以糠擊
拊鼓乃歌也鄭司農云下管吹管者在堂下登歌下
管貴人聲也下棟小鼓也疏曰樂器笙簫之屬播
播揚其聲王氏曰詩曰應棟縣鼓棟鼓之以引樂

疏曰射節若樂以騶虞九節貍首七節采繁采蘋五
節之類則大師為之歌 鄭氏曰大師執同律以聽
軍聲大師大起軍師兵書曰王者行師出軍之日授
將弓矢士卒振旅將張弓大呼大師吹律合音商則
戰勝軍士強角則軍擾多變失志宮則軍和士卒同
心徵則將急數怒軍士勞羽則兵弱少威明鄭司農
說以師曠曰吾驟歌北風又歌南風不競多死聲楚
必無功 王介甫曰詔吉凶使知所戒一體之盈虛

通於天地應於物類故占之以蓍卜眡之以視象聽之以同律皆得其祥焉 鄭司農云淫陳也陳其生時行迹為作謚 王介甫曰史序事王行見於事故太史讀誅瞽掌樂王德成於樂故大師作謚謚成德之名也 王氏曰凡國之瞽矇正焉則皆屬於大師小師掌教鼓鼗祝敔塤簫管弦歌大祭祀登歌擊拊下管擊應鼓徹歌大饗亦如之大喪與廡凡小祭祀小樂事鼓輶掌六樂聲音之節與其和

與廡音預和戶卧反

鄭氏曰教教瞽矇也出音曰鼓鼗如鼓而小持其柄
搖之旁耳還自擊鄭司農云柷如漆筩中有椎故木
虎也埴六孔管如簾六孔玄謂埴燒土為之大如鴈
卵簫編小竹管如筴而小併兩而吹之弦琴瑟也歌
依永詩也 王氏曰鼗埴管簫堂下之樂也弦歌堂
上之樂也柷以合樂敔以止樂上下各有之以樂不
可無作止之節故也書曰戛擊鳴球搏拊琴瑟以詠
考擊柷敔也此用之於堂上也又曰下管鼗鼓合止

祝欽此用之於堂下也 鄭氏曰應鼙也 陳氏曰

詩云應田縣鼓爾雅云大鼓謂之鼗小鼓謂之應大

射禮有朔鼙應鼙朔鼙乃所謂輦也 鄭氏曰徹歌

於有司徹而歌雍也大喪與廋從大師也凡祭祀小

樂事鼓輦如大師 王氏曰六樂之作先後曲直則

有節而小大清濁相應而不相陵則和矣

瞽矇掌播鼗祝欽墳簫管弦歌諷誦詩世奠繫鼓琴瑟

掌九德六詩之歌以役大師 矇音蒙杜子春云帝讀為定其字為奠書亦或為奠

繫戶
計反

鄭氏曰播發揚其音也 王氏曰小師教之瞽矇播
之鄭司農曰諷誦詩主誦詩以刺君過故國語曰矇
賦矇誦謂詩也 王介甫曰世奠繫當從故書世帝
繫古書有謂之帝繫者 鄭氏曰杜子春云世繫謂
帝繫諸侯卿大夫世本之屬是也小史主次序先王
之世昭穆之繫述其德行瞽矇主誦詩并誦世繫以
戒勸人君也故國語曰教之世而為之昭明德而廢

昏幽焉以怵懼其動 王氏曰誦詩則以知民風之
厚薄誦世帝繫則以知前世之興衰小史奠繫世則
定繫世而已非誦之也鼓琴瑟者誦詩及世帝繫也
則鼓琴瑟以合而和之 王氏琴瑟是至正之音三
者皆以警戒也 左傳醫和曰先王之樂所以節百
事也故有五節遲速本末以相及中聲以降五降之
後不容彈矣於是有煩手淫聲惱堙心耳君子弗聽
也物亦如之至於煩乃舍也已無以生疾君子之近

琴瑟以儀節也非以怡心也天有六氣降生五味發為五色徵為五聲淫生六疾

眡瞭掌凡樂事播鼗擊頌磬笙磬掌太師之縣凡樂事相瞽大喪廡樂器大旅亦如之賓射皆奏其鐘鼓鼗愷

獻亦如之

眡讀為虎視之視瞭音了頌音容相息亮反鼗音戚

䟽曰眡瞭以扶工也亦兼使作樂 王氏曰亦播鼗者以鼗所用者衆也磬在東方曰笙東生出之方也磬在西方曰頌西成功之方也 鄭氏曰頌或作庸

庸功也大射禮曰樂人宿縣于阼階東笙磬西面又
曰西階之西頌磬東面 王氏曰掌大師之縣為大
師縣樂器也 鄭氏曰凡樂事相瞽相謂扶工 王
氏曰大旅大故而祭亦如大喪陳樂器而不作也賓
射王與諸侯射奏鐘鼓以為之節焉 鄭氏曰愷獻
獻功愷樂也杜子春讀鑿為憂戚之戚謂戒守鼓也
擊鼓聲疾數故曰戚

典同

中士二人府一人史一人胥二人徒二十人

王介甫曰典律同而名之曰典同典同則律可知矣

掌六律六同之和以辨天地四方陰陽之聲以為樂器

凡聲高聲磬正聲緩下聲肆陂聲散險聲斂達聲羸微

聲醵田聲衍侈聲箝翕聲鬱薄聲甄厚聲石凡為樂器

以十有二律為之數度以十有二聲為之齊量凡和樂

亦如之

鄭大夫讀磬為袞冕反袞古本反陂讀為險陂之陂彼義反醵音閤又於瞻反侈昌氏反箝側

百反翕音掩甄音震齊才計反

雜說大師主於和聲故合陰陽之聲典同主於制器
故辨天地四方陰陽之序惟大師既合其聲然後付
之典同制器故典同曰掌六律六同之和 鄭氏曰
陽聲屬天陰聲屬地天地之聲布於四方為作也

王介甫曰天地四方各有陰陽之聲是為十有二聲
辨十有二聲雜比而和之取中聲焉以為樂器 王
氏曰凡聲生於形形異則聲異 鄭氏曰高鐘形太
上上大也高則聲上藏袞然如裏 王氏曰此鳧氏

所謂鐘小而長小而長則形高 鄭氏曰正謂上下
直直正則聲緩無所動下謂鐘形太下下大也下則
聲出放肆 王氏曰此鳧氏所謂鐘大而短大而短
則其形下 鄭氏曰陂謂偏侈陂則聲離散也險謂
偏弇險則聲斂不越也達謂其形微大達則聲有餘
若大放也微謂其形微小鰭聲小不成也回謂其形
微圓回則其聲淫衍無鴻殺也侈謂中央約侈則聲
迫窄出去疾也弇謂中央寬弇則聲鬱勃不出也甄

猶掉也鐘微薄則聲掉鐘太厚則如石叩之無聲

王氏曰凡為樂器皆以此十二聲為之齊量而取中聲焉故其聲之病者得以審而去之凡播於樂器者無非和聲也數者一二三四之所計也度分寸丈尺之所揔也數度取之十有二律齊量取之十有二聲此樂器形聲所以無過不及而皆得其中和焉 鄭氏曰和謂調其故器也

磬師

中士四人下士八人府二人史二人胥六人徒六十人
掌教擊磬擊編鐘教繅樂燕樂之鐘磬凡祭祀奏繅樂

杜子春讀編為編書之編
繅為繅錦之繅莫半反

鄭氏曰教教眡瞭也 劉氏曰宮縣有特磬十二鍾
鐘十二皆依辰次陳之以應其方之律也編磬編鐘
各十有六共為一虞而磬師之職掌教眡瞭擊特磬
與編磬而又教眡瞭擊編鐘也 王氏曰言擊編鐘
則鐘之不編者鐘師自擊之 注䟽繅樂雜聲之和

樂者學記曰不學操縵不能安弦燕樂房中之樂此
即關雎二南也二樂皆教其鐘磬 王氏曰祭祀奏
縵樂則脩樂故也

鐘師

中士四人下士八人府二人史二人胥六人徒六十人
掌金奏凡樂事以鐘鼓奏九夏王夏肆夏昭夏納夏章
夏齊夏族夏祴夏鵞夏九祭祀饗食奏燕樂凡射王奏
騶虞諸侯奏貍首卿大夫奏采蘋士奏采蘩掌鼙鼓縵

樂

故書納作內杜子春云內當為納齊側皆反祓讀為陔鼓之陔占哀反驚五羔反

註疏金奏擊金以為奏樂之節金謂鐘及鐃以二者皆不編獨縣而已以鐘鼓奏九夏鐘師直擊鐘不擊鼓而兼云鼓者凡作樂先擊鐘次擊鼓欲見鼓鐘先後次第故兼言之也 鄭氏曰夏大也樂之大歌有九王出入奏王夏尸出入奏肆夏牲出入奏昭夏四方賓客來奏納夏臣有功奏章夏夫人祭奏齊夏族人侍奏族夏客醉而出奏陔夏

在氏曰陔者陔切之使不失禮也祓亦王

戒意故
通用

公出入奏驚夏春秋穆叔如晉晉侯享之金

奏肆夏之三不拜工歌文王之三又不拜歌鹿鳴之三
三拜曰三夏天子所以享元侯也使臣不敢與聞以
文王鹿鳴言之則九夏皆詩篇也名頌之族類也此
歌之大者載在樂章樂崩亦隨而亡是以頌不能具
呂叔玉云肆夏時邁也時
邁曰肆于時夏允王保之王氏曰此九夏王夏惟王
得奏之自肆夏以下故燕禮奏肆夏若大夫之奏肆
夏則僭禮也故郊特牲云大夫之奏肆夏自趙文子

始所以譏之也 鄭氏曰祭祀饗食奏燕樂以鐘鼓

奏之也掌鼙鼓繚樂謂作繚樂則鐘師擊鼙和之

笙師

中士二人下士四人府二人史二人胥一人徒十人

掌教敎竽笙塤箛簫箎篳管舂牘應雅以教祓樂凡祭

祀饗射共其鐘笙之樂燕樂亦如之大喪廞其樂器及

葬奉而藏之大旅則陳之

敎昌垂反竽音于
牘音獨遂音滌

鄭氏曰教教眡瞭也鄭司農云竽三十六簧笙十三

簧箎七空春牘以竹大五六寸長七尺短者一二尺
其端有兩空髹畫以兩手築地應六尺五寸其中有
椎雅狀如漆筩而弇口大二圍長五尺六寸以羊韋
鞔之有兩紐䟽畫玄謂簫如篴三孔絃樂絃夏之樂
牘應雅教其春者謂以築地笙師教之則三器在庭
可知矣賓醉而出奏絃夏以此三器為行之節明不
失禮也鐘笙與鐘聲相應之笙廡興興謂作之奉猶
送也大旅則陳之陳於饌處而已不泣其縣

鑄師

鑄音博

中士二人下士四人府二人史二人胥二人徒二十人
王氏曰鑄小鐘也國語曰細鈞有鐘無鑄尚大故也
大鈞有鑄無鐘尚細故也

掌金奏之鼓凡祭祀鼓其金奏之樂饗食賓射亦如之
軍大獻則鼓其愷樂凡軍之夜三鑿皆鼓之守鑿亦如
之大喪廋其樂器奉而藏之

鄭氏曰掌金奏之鼓謂主擊晉鼓以奏鐘鑄也然則

擊鐃者亦眡瞭歟 王氏曰軍中夜戒之鼓有三故

曰三鑿 鄭氏曰守鑿備守鼓也鼓之以鼗鼓 雜

說軍已發行而國猶不廢守此所以又有守鑿後世

用師行軍而京師戒嚴者本於此

鞀師

讀如鞀
鞀之鞀

下士二人府一人史一人舞者十有六人徒四十人

鄭氏云鄭司農說以明堂位曰鞀東夷之樂

掌教鞀樂祭祀則帥其屬而舞之大饗亦如之

王氏曰韎師旄人韞韘氏皆掌夷樂而命名不同者
韎言其所服旄言其所執韞言其所履韘赤韋也作
其樂舞因使服其服從其宜也帥其屬而舞之則韎
師之屬舞者十六人也 鄭氏曰舞之以東夷之舞

劉氏曰祭祀大饗皆用之者四夷之來王也 陳氏

曰王者必作四夷之樂一天下也白虎通云王者制
夷狄樂不制夷狄禮所以均中國不制禮者恐夷人
不能隨中國禮也記曰納蠻之樂於太廟言廣魯於

天下也先王之於夷樂雖或用之然夷不可以亂華
哇不可以雜雅蓋亦後之而弗先外之而弗內也觀
夾谷之會齊有司請奏四夷樂孔子曰吾兩君為好
會夷狄之樂何為請有司却之然則魯納夷蠻之樂
於太廟蓋陳之於門而已唐之時皆奏於四門之外
豈古之遺制歟

旄人

下士四人舞者衆寡無數府二人史二人胥二人徒二

十人

鄭氏曰旄旌牛尾舞者所持以指麾

掌教舞散樂舞夷樂凡四方之舞仕者屬焉凡祭祀賓客舞其燕樂

鄭氏曰散樂野人為樂之善者夷樂四夷之樂 王
氏曰旄人特教其舞而已 劉氏曰四方以舞仕於
伶官者屬之旄人焉

籥師

中士四人府二人史二人胥二人徒二十人

鄭氏曰籥舞者所吹春秋萬入去籥 王介甫曰籥三孔主中聲而上下之律呂於是乎生樂之本也

掌教國子舞羽歛籥祭祀則鼓羽籥之舞賓客饗食則亦如之大喪廞其樂器奉而藏之

鄭氏曰文舞有持羽吹籥者所謂籥舞也文王世子曰秋冬學羽籥詩云左手執籥右手秉翟 劉氏曰文王世子云小樂正學干大胥贊之籥師學戈籥師

丞贊之則亦教武舞矣 陳氏曰周禮籥師掌教國
子舞羽敝籥籥章掌擊土鼓幽籥又笙師掌教籥明
堂位曰土鼓葦籥伊耆氏之樂也名之曰籥以忝籥
之法在是故也羽舞皆執籥以聲音之本在是故也
劉氏曰鼓之者以鼓為之節 疏曰所獻樂器唯羽
籥耳

籥章

中士二人下士四人府一人史一人胥二人徒二十人

鄭氏曰簫章吹簫以為詩章

掌土鼓豳籥中春晝擊土鼓歛豳詩以逆暑中秋夜迎寒亦如之凡國祈年于田祖歛豳雅擊土鼓以樂田畯

國祭蜡則歛豳頌擊土鼓以息老物

豳被貧反中音仲樂音洛咬音俊故

書蜡為蠶杜子春云蠶當為蜡

鄭氏曰杜子春云土鼓以瓦為匡以革為兩面可擊也鄭司農云豳籥豳國之地竹豳詩亦如之謂豳籥豳人吹籥之聲章明堂位曰土鼓蒯桴葦籥伊耆氏

之樂 王介甫曰王業之起本於幽而樂之作始於
土鼓本於籥逆暑迎寒祈年皆本始民事息老物則
息使復本反始故所擊者土鼓所吹者幽籥其章用
幽詩焉 又曰中春晝書所謂日中陽於是而分故
逆暑中秋夜書所謂宵中陰於是而分故迎寒 鄭
氏曰幽詩幽風七月也七月言寒暑之事迎氣歌其
類也此風也而言詩詩總名也 疏曰七月云一之
日齋發二日之栗烈七月流火之等是寒暑之事

鄭氏曰逆暑以晝求諸陽迎寒以夜求諸陰祈年祈
豐年也田祖始耕田者謂神農也豳雅亦謂七月也
七月又有于耜舉趾饁彼南畝之事是亦歌其類鄭
司農云田畯古之先教田者爾雅曰畯農夫也杜子
春云郊特牲曰天子大蜡八伊耆氏始為蜡歲十二
月而合類萬物而索享之也蜡之祭也主先嗇而祭
司嗇也黃衣黃冠而祭息田夫也既蜡而收民息已
玄謂十二月建亥之月也求萬物而祭之者萬物助

天成歲事至此為其老而勞乃祀而老息之於是國亦養老焉月令孟冬勞農以休息之是也幽頌亦七月也七月又有獲稻作酒躋彼公堂稱彼兕觥萬壽無疆之事是亦歌其類也謂之頌者以其言歲終人功之成孔穎達詩疏曰鄭氏詩箋云七月二章云是謂幽風六章云是謂幽雅卒章云是謂幽頌自始至終別為三體劉氏曰此三事皆奏幽詩或用其風重民時也或用其雅尊先嗇也或用其頌報成功

也

鞮鞻氏

鞮丁奚反鞻讀如履九具反

下士四人府一人史一人胥一人徒二十人

王氏曰鞮鞻者四夷樂人所履之屨 芸閣呂氏曰

鞮鞻革屨也周官有鞮鞻氏蓋變夷之服也革去毛而未為韋非吉屨也

掌四夷之樂與其聲歌祭祀則歛而歌之燕亦如之

鄭氏曰四夷之樂東方曰鞮南方曰任西方曰侏離

北方曰禁 劉氏曰王者設官掌四夷之樂者示四夷之樂王化也故於祭祀賓客服其服奏其樂聲其歌以明王道之廣大也

典庸器

下士四人府四人史二人胥八人徒八十人

鄭氏曰庸功也鄭司農云庸器有功者鑄器銘其功春秋傳曰以所得於齊之兵作林鍾而銘魯功焉

王介甫曰征伐所得之器而謂之庸器者庸民功也

則征伐之功凡以為民非利其器故也

掌藏樂器庸器及祭祀帥其屬而設筍虞陳庸器饗食
賓射亦如之大喪廋筍虞

王氏曰筍虞所以垂鐘磬之屬也橫曰筍植曰虞
鄭氏曰設筍虞眡瞭當以縣樂器焉陳功器以華國
也

司干

下士二人府二人史二人徒二十人

鄭氏曰干舞者所持謂盾也春秋傳曰萬者何干舞也

掌舞器祭祀舞者既陳則授舞器既舞則受之賓饗亦如之大喪廋舞器及葬奉而藏之

王氏曰樂有文舞有武舞文舞則籥師教之武舞則司干教之 劉氏曰國子未成童之時所學小舞則此干戈當須輕小其制便於國子秉執回旋故列在樂器之中而屬於大司樂也文王世子所謂冬夏學

干戈秋冬學羽籥皆於東序則是舞勺舞象時所用之器司兵之職祭祀授舞者兵司戈盾之職授舞則國子成人者學六舞當受於夏官矣

大卜下大夫二人卜師上士四人卜人中士八人下士十有六人府二人史二人胥四人徒四十人

鄭氏曰問龜曰卜大卜卜筮官之長 王氏曰大卜以下大夫為之而其官屬甚衆蓋先王重其事故也先王成天下之亶亶定天下之吉凶莫大乎蓍龜而

名官獨曰大卜者以龜為主也左傳所謂筮短龜長不如從長者是也蓋物生而後有象象而後有滋滋而後有數黃氏曰三從二逆作內吉作外吉二從二逆作內吉作外凶人可違也卜筮不可違也筮可違也卜不可違也故乃心卿士庶民與筮之數或可逆至於龜則有從而已疏曰卜人無別職以其助大卜卜師行事故也

大卜掌三兆之灋一曰玉兆二曰瓦兆三曰原兆其經

兆之體皆百有二十其頌皆千有二百

兆或作邽

疏曰大卜所掌先三兆後三易次三夢者以筮短龜
長夢以叶卜筮故以先後為次 鄭氏曰兆者灼龜
發於火其形可占其象似玉瓦原之豐罅是用名之
焉原原田也上古以來其法可用者有三 疏曰玉
兆夏也瓦兆殷也 鄭氏曰杜子春云原兆有周之
兆 王氏曰經常也其經兆之體則龜常兆之體也
鄭氏曰頌謂繇也三法體繇之數同其名占異耳百

二十每體十絲

掌三易之灋一曰連山二曰歸藏三曰周易其經卦皆八別皆六十有四

鄭氏曰易者揲耆變易之數可占者也 王氏曰夏

曰連山商曰歸藏周曰周易 疏曰連山以純艮為

首艮為山也歸藏以純坤為首坤為地萬物莫不歸

藏也周易以純乾為首焉夏殷易以七八不變為占

周易以九六變為占左傳云穆姜筮之遇艮之八周

易占九六而云遇艮之八是據夏商不變為占之事
其經卦皆八乾坤震巽坎離艮兌也其別六十四也
鄭氏曰每卦八變者重之數也

掌三夢之灋一曰致夢二曰疇夢三曰咸陟其經運十

其別九十

疇讀如諸戎疇之疇居
綺反陟如字運當為蟬

鄭氏曰夢者人精神所寤可占者致夢言夢之所至
夏后氏作焉疇得也亦言夢之所得殷人作焉咸皆
也陟得也言夢之皆得周人作焉經運是視輝所掌

十輝也王者於天日也夜有夢則晝眠日旁之氣以
占其吉凶凡所占者十輝每輝九變其術今亡 劉
氏曰王者之心天地萬物之心也故其心之有夢則
日為之輝是以與日同占焉

以邦事作龜之八命一曰征二曰象三曰與四曰謀五
曰果六曰至七曰雨八曰瘳以八命者贊三兆三易三
夢之占以觀國家之吉凶以詔救政

瘳勅留反

王氏曰古之作事者不殫一己之思慮明則謀之人

幽則謀之鬼故其所以作龜而命之者有八焉 鄭

氏曰作龜作其辭於將卜以命龜 王介甫曰征討

伐及行役也 疏曰鄭良霄云先王卜征五年歲習

其祥 王介甫曰象天象變動 鄭氏曰鄭司農云

天垂象見吉凶春秋傳曰天事恒象皆是也 鄭氏

曰與所與共事也 劉氏曰謀大疑之得失也果者

卜所求之果否也

鄭氏曰果者果決為之若吳伐楚
楚司馬子魚卜戰令龜曰鮒也以

其屬死之楚師繼之
尚大克之吉是也

至者卜所俟之至否也 王氏

曰雨者卜時之雨不雨瘳者卜病之瘳不瘳 鄭氏
曰以此八事命卜筮蓍龜參之以夢春秋傳曰筮襲
於夢武王所用 王氏曰邦事之八命以卜之龜故
用三兆之法以占之以筮之蓍故用三易之法以占
之以考之夢故用三夢之法以占之作八命非特占
之於龜亦驗之於筮叶之於卜而後已夫大卜以龜
八命贊易夢之占而占人以八筮占八頌則占龜以
筮夢合焉故洪範大疑謀及卜筮兩眡其從違以斷

吉凶而武王曰朕夢協朕卜戎商必克者此也如是則國家之吉凶可以前知則詔王正厥事以救之也蓋吉凶之變雖自乎天而其所以感召之者實自乎人知凶而修政以救之則可以轉禍而為福矣古人有以人君之言三而熒惑之退舍孰謂救政之不可為歟 雜說大卜一官專在詔救政蓋國家將興必有禎祥國家將亡必有妖孽既於卜筮前知使人君預為修省之道其為國家之利大矣

凡國大貞卜立君卜大封則眡高作龜大祭祀則眡高
命龜凡小事涖卜國大遷大師則貞龜凡旅陳龜凡喪
事命龜

鄭氏曰鄭司農云貞問也國有大疑問於蓍龜王
氏曰立君以立嗣天下之本也大封以命諸侯一國
之本也故為事之大鄭氏曰卜用龜之腹骨骨近
足者其部高眡高眡龜骨高處作龜以火灼之以作
其兆也涖卜代宗伯也陳氏曰大卜或作或命或

貞或陳其事不一喪祭輕於大貞則命龜大遷大師
輕於喪祭則貞龜凡旅則陳龜而已考之儀禮卜人
奠龜宗人眡高及坐命龜而後卜人坐作龜然則大
卜於大祭祀凡喪事命之而不作則作者其屬也國
大貞作之而不命則命者小宗伯也貞龜則貞之於
卜位而不親命也陳龜則陳之於饌所而不卜也

王介甫曰陳龜陳而不作與陳樂器同

卜師掌開龜之四兆一曰方兆二曰功兆三曰義兆四

曰弓兆凡卜事眡高揚火以作龜致其墨凡卜辨龜之上下左右陰陽以授命龜者而詔相之

鄭氏曰開開出其占書也經兆百二十體此言四兆者分之為四部若易之二篇書金縢曰開籥見書是謂歟其云方功義弓之名未聞眡泣卜也揚猶熾也致其墨者孰灼之明其兆 劉氏曰兆體旁豐為兆徵而不可以辨故致其墨食則見而可辨矣書曰惟洛食 疏曰龜有六種 鄭氏曰上仰者也下俯者

也左左倪者也右右倪者也陰後弇也陽前弇也所卜者當各用其龜大祭祀喪事大卜命龜則大貞小宗伯命龜其他卜師命龜卜人作龜則亦辨龜以授卜師詔相告以辭及威儀

龜人

中士二人府二人史二人工四人胥四人徒四十人

鄭氏曰工取龜攻龜

掌六龜之屬各有名物天龜曰靈屬地龜曰繹屬東龜

曰果屬西龜曰雷屬南龜曰獵屬北龜曰若屬各以其方之色與其體辨之凡取龜用秋時攻龜用春時各以其物入于龜室上春釁龜祭祀先卜若有祭事則奉龜以往旅亦如之喪亦如之

繹音亦果讀為羸魯火反雷力胃反釁許靳反

鄭氏曰屬言非一也色謂天龜玄地龜黃東龜青西

龜白南龜赤北龜黑龜俯者靈仰者繹前弇果後弇

獵左倪雷

疏曰左倪不類不類即雷一也以其在陰方故不能長前後而頭向左相睥睨然

右倪若是其體也東龜南龜長前後在陽象經也西

龜北龜長左右在陰象緯也天龜俯地龜仰東龜前南龜卻西龜左北龜右各從其耦也龜室六龜各異室也秋取龜及萬物成也攻治也治龜骨以春是時乾解不發傷也上春夏正建寅之月月令孟冬云釁祠龜策秦以十月建亥為歲首則秦亦或以歲首釁龜耳釁者殺牲以血之神之也先卜始用卜筮者

王氏曰耕則祭先嗇馬則祭先牧食則祭先飯示不忘本也況卜以吉凶以前民用安可忘之乎天曰祀

地曰祭兼言祭祀者天神地明而不測卜能通之在所尊焉天地之道也鄭司農云祭祀先卜其日與其牲鄭氏曰奉猶送也送之於所當卜

董氏

董時髓反
本又作壘

下士二人史一人徒八人

王氏曰董荆木也灼龜用荆故名官曰董氏

掌共燂契以待卜事凡卜以明火爇燂燂遂歃其燂契以

授卜師遂役之

燂又哉約反燂讀如戈鑄之鑄存悶反
契苦計反燂讀如戈鑄之鑄存悶反

鄭氏曰杜子春云燂謂所焚灼龜之木也契謂契龜

之鑿也詩云爰始爰謀爰契我龜玄謂士喪禮曰楚

燂

吐敦反

置于燂在龜東楚燂即契所用灼龜也燂謂

炬其存火

疏曰後鄭取燂火之義熒熒然也

杜子春云明火以陽燧

取火於日 王氏曰契之銳頭為燂以契之銳頭火

而吹之其頭若戈鑄焉燂契既然乃授卜師以卜師

揚火作龜以致其墨是也董氏因而贊相其事為卜

師之所役也

占人

下士八人府一人史二人徒八人

鄭氏曰占人占蓍龜之卦兆吉凶 王氏曰易曰以

卜筮者尚其占蓋占事知來以視兆吉凶則謂之占人

掌占龜以八簪占八頌以八卦占簪之八故以眡吉凶
凡卜簪君占體大夫占色史占墨卜人占圻凡卜簪既
事則繫幣以比其命歲終則計其占之中否

簪音莖繫音係比毘

志反

鄭氏曰占人亦占筮言掌占龜者筮短龜長主於長以八筮占八頌謂將卜八事先以筮筮之言頌者同於龜占也 疏曰八頌之八事即大卜邦事作龜之八命也八故亦八事也 鄭氏曰以八卦占筮之八故謂八事不卜而徒筮之也其非八事則用九筮占人亦占焉 王氏曰筮有八故八筮則八故之筮也龜有八命八頌則八命之頌八卦則八筮之卦由此

推之則占人雖以占龜為主亦合筮而占焉兩眊其從違以斷吉凶也 王介甫曰卜以龜筮以蓍占體占色占墨占坼皆占龜而曰凡卜筮則筮亦占體故也詩曰爾卜爾筮體無咎言筮占體可見矣 鄭氏曰體兆象也色兆氣也墨兆廣也坼兆疊也體有吉凶色有善惡墨有小大坼有微明尊者視兆象而已卑者以次詳其餘也周公卜武王占之曰體王其罔害凡卜象吉色善墨大坼明則逢吉 王氏曰卜之

事龜拆而後墨見墨見而後色著色著而後體備卜
人先占坼史占墨次之大夫占色又次之衆占備焉
而後君占體以斷吉凶事之序也故玉藻曰卜人定
龜史定墨君定體據事序先後言之而周禮先言君
占體者尊卑之序也九卜筮既事則繫幣以比其命
謂禮神之幣也比其命謂書其命龜筮之辭而比之
歲終則計其占之中否則以考官占之得失而進退
之

筭人

中士二人府一人史二人徒四人

鄭氏曰問蓍曰筮其占易

掌三易以辨九筭之名一曰連山二曰歸藏三曰周易
九筭之名一曰巫更二曰巫咸三曰巫式四曰巫目五
曰巫易六曰巫比七曰巫祠八曰巫參九曰巫環以辨
吉凶九國之大事先筭而後卜上春相筭九國事共筭

比毗志反
相息亮反

王氏易以卦言筮以數言定數然後成卦則筮定數
於始卦成體於終也易有三則所立之名不同筮有
九則所筮之事不一 劉氏曰筮之有九猶龜之八
命 鄭氏曰此九巫讀皆當為筮字之誤也更謂筮
遷都邑也咸猶僉也謂筮衆心歡否也式謂筮制作
法式也目謂事衆筮其要所當也易謂民衆不悅筮
所改易也比謂筮與民和比也祠謂筮牲與日也參
謂筮御與右也環謂筮可致師不 王氏曰大事先

筮而後卜者兼用卜筮而尊龜焉故後之吉凶取斷於龜也 鄭氏曰相謂釋也 王介甫曰筮亦有美惡如龜矣

占夢

本又作寤

中士二人史二人徒四人

掌其歲時觀天地之會辨陰陽之氣以日月星辰占六夢之吉凶一曰正夢二曰噩夢三曰思夢四曰寤夢五曰喜夢六曰懼夢季冬聘王夢獻吉夢于王王拜而受

之乃舍萌于四方以贈惡夢遂令始讎毆疫

杜子春云
噩當為驚

愕之愕寤五故反舍
讀為釋讎乃多反

王氏曰其歲時其夢之歲時也 王介甫曰人之精

神與天地同流通萬物一氣也易曰乾道變化各正

性命保合大和乃利貞此占夢之所以設也 王氏

曰列子曰神遇為夢形接為事故晝想夜夢神形所

遇一體之盈虛消息皆通於天地應於物類蓋人之

生也受命於天地賦形於陰陽則其精神往來與陰

陽相為流通而禍福妖祥成敗得喪之出於吉凶者
固無所逃矣 鄭氏曰天地之會建厭所處之日辰
陰陽之氣休王前後日月星辰之行及合辰所在春
秋昭三十一年十二月辛亥朔日有食之是夜也晉
趙簡子夢童子保而轉以歌旦而日食占諸史墨對
曰六年及此月也吳其入郢乎終亦弗克入郢必以
庚辰日月在辰尾庚午之日始有適火勝金故弗
克此以日月星辰占夢者也正夢無所感動平安自

夢也噩夢驚愕而夢思夢覺時所思念之而夢 王

介甫曰寤夢若狐突夢太子申生 鄭氏曰喜夢喜

悅而夢懼夢恐懼而夢季冬日窮于次月窮于紀星
回于天數將幾終於是發幣而問若休慶之云爾因
獻羣臣之夢言於王歸美焉詩云牧人乃夢衆維魚
矣旒維旗矣此所獻吉夢 劉氏曰人之精神通乎
天地機祥兆於至誠中庸曰至誠之道可以先知國
之將興必有禎祥將亡必有妖孽見乎蓍龜動乎四

體禍福將至善必先知之不善亦必先知之故至誠如神季冬聘問于王之夢以天道終而復始必有機祥預兆于夢也吉則獻其說王拜受之貴天命也不吉則舍萌于四方者萌兆也謂夢不吉則求其所以不吉之萌兆於四方而舍去之以贈送其惡夢使不復效也遂令始讎驅疫以逐不祥之氣用以受新焉

眡禊

子鶴反

中士二人史二人徒四人

鄭氏曰侵陰陽氣相侵漸成祥者魯梓慎云吾見赤黑之侵 王氏曰易曰觀乎天文以察時變又曰天垂象見吉凶聖人則之天人同流相應而不相遠先王於天象必立官以觀妖祥辨吉凶所以和同天人之際使之無間此眡侵之所由設也

掌十輝之灋以觀妖祥辨吉凶一曰侵二曰象三曰鑄四曰監五曰閤六曰魯七曰彌八曰叙九曰濟十曰想掌安宅叙降正歲則行事歲終則幣其事

輝音運鑄讀如童子佩鑄

之鐫許規反魯亡鄧反故書
彌作迷隣作資幣必世反

鄭氏曰鄭司農云輝日光氣也 王氏曰妖祥者吉

凶之方萌吉凶者妖祥之成事 鄭氏曰鄭司農云

侵陰陽氣相侵也象者如赤烏也 劉氏曰象者陰

氣附日凝結成象鐫墨氣如鐫刺於日也 鄭氏曰

鄭司農云監雲氣臨日也 劉氏曰闇者有食之既

方晝而闇也魯者陰氣蒙蒙日光魯然也彌者橫氣

貫日迷天也叙者片段成列有次序也隣蟠竦升隣

于日旁也想雜氣象似以成形想也 又曰日者大
陽之精出地則為晝照物則為光陰斜之象或侵于
晝日光所灼莫不消除也今日旁有陰邪之氣干犯
之而不能消除者陽剛之德衰日光為之微弱陰邪
盛大莫克消除以成十者之異以洪範五行推之則
人君無剛健之德陰邪氣盛干犯日光謫見于天以
示警戒也聖人設官以掌其事方有萌兆則詔于王
而救政脩焉 王氏曰掌安宅叙降者謂人覩妖祥

則不安其居者視禋則以其法為之安其居處也又為叙其妖祥而降之使之備其凶而應其吉若保章降凶荒之祲象是也正歲則行事者行安宅叙降之事以豫告乎下也 鄭氏曰幣斷也謂討其吉凶然否多少

大祝下大夫二人上士四人小祝中士八人下士十有六人府二人史四人胥四人徒四十人

鄭氏曰大祝祝官之長 胡仁仲曰醫卜祝史技數

也然切於人身而人理之所不能不用者也先王之
世醫卜祝史世守其事而屬身于官醫以十全為上
過誤而殺人者有誅有大事則訊之卜有疑事則決
之卜而吉凶軍賓嘉凡有告于鬼神者必祝史宣其
意然後主事者得全其精而與神明交矣今世則不
然散于民間取人者無罪驕人者無禁殺人者無誅
而妙達陰陽之寇有十全之功者官亦莫之旌用也
國有大事事有大疑內不反復諸心外不謀之士庶

精不謀之龜筮而卜道以亡噫五禮之不得其理久矣君子漫不知其義祝史豈能知其數哉故民間惟有疾病則卜而卜者率皆誑言某鬼某鬼之怨怒以惑之民寧破產祀鬼而不求醫至有收荒夷之神驅除其祖考而不薦者豈不傷人情逆天理乎是故君天下欲神其民者雖醫卜祝史之流亦必如先王之世然後禮教可行也

大祝掌六祝之辭以事鬼神示祈福祥求永貞一曰順

祝二曰年祝三曰吉祝四曰化祝五曰瑞祝六曰筴祝

祝之秀反
後皆同

疏曰此六辭皆是祈禱之事皆有辭說以告神故曰

六祝之辭 王氏曰先王中心陳信於鬼神示而其

誠不可見大祝以辭薦信於鬼神示然後可以求福

祥求永貞 劉氏曰先儒咸以小祝小祭祀侯禋之

事以解六辭非其義也大祝者祈祝大事也故郊祀

天地社稷宗廟六享利用大祝之六辭所以祈福祥

於國家 鄭氏曰永長也貞正也求多福歷年得正

命也 劉氏曰順祝祈四時叶順也年祝祈大有年

也 鄭氏曰吉祝祈福祥 王介甫曰化祝彌裁兵

遠臯疾 劉氏曰瑞祝祈順氣成象天降甘露地出

醴泉也筴祝祈龜筮不違乎人大同而逢吉也

若金
膝冊

也祝

掌六祈以同鬼神示一曰類二曰造三曰禱四曰禳五

曰攻六曰說

造七報反
禱古
外反
禳音詠

劉氏曰彼六祝者因祭享祀而祝也 此六祈者特
為一事祭而祈之 王氏曰夫鬼神示之於人幽明
異勢疑若不可同也然鬼神聰明正直依人而行先
王與鬼神合其吉凶則同鬼神示固有道矣大祝之
六祈以其陳信於鬼神示而已類合其類而祭若類
上帝之屬也造即其所而祭若造于祖之屬禴若禴
國之凶荒民之札喪之屬禳若春秋祭禳之屬攻以
治去其害故剪氏以攻禳攻之之屬以辭責之之謂

說若庶氏以攻說禴之之屬先王所祈如此亦以與民同吉凶之患而已彼於禍福之際固未數數然也作六辭以通上下親疏遠近一曰祠二曰命三曰誥四曰會五曰禱六曰誅

鄭司農云詞當為辭

鄭氏曰一曰祠者交接之辭春秋傳曰古者諸侯相見號辭必稱先君以相接辭之辭也 劉氏曰命者王者之命令以通下情若說命畢命誥者若湯誥洛誥會者謂王者會同諸侯有辭以誓之若甘誓湯誓

泰誓 鄭氏曰禱賀慶言福祚之辭若禮記所謂善

頌善禱誅若哀公誅孔子之屬

賽禱曰祠禱若禱爾于上下神祇之屬

辨六號一曰神號二曰鬼號三曰示號四曰牲號五曰

齎號六曰幣號

齎音咨

劉氏曰謂易其常名以為美稱用申其所以尊而敬

之之心焉 鄭氏曰神號若云皇天上帝鬼號若云

皇伯祖某示號若云后土地祇牲號犧牲皆有名號

若牛曰一元大武豕曰剛鬣齎染盛皆有名號若黍

曰香合梁曰香萁稻曰嘉疏幣號若玉曰嘉玉幣曰
量幣

辨九祭一曰命祭二曰衍祭三曰炮祭四曰周祭五曰

振祭六曰擗祭七曰絕祭八曰繚祭九曰共祭

炮白交
反擗而

泉反繚
音了

劉氏曰大祝之設所以事鬼神者也此九祭當是六
享於宗廟而皇尸祭食之法是以大祝掌之然而祭
食祭所先進凡賓主行食禮則莫用焉天子祭禮不

存今以諸侯之大夫少牢饋食之禮明之命祭謂安尸尸坐祝始命尸取韭醢徧擣于三豆祭于豆間是也衍祭謂上佐食取黍稷及切肺受尸尸受而同祭于豆間賓尸所謂兼祭以其衍多故云衍也炮祭謂次賓羞羊臠尸擣鹽而祭也周祭謂賓尸依殷祭之也振祭謂凡牢榦魚腊骼肩皆擣泉之振之擬祭弗奠是也擣祭謂凡取菹以擣于醢而祭也絕祭謂剗肺以絕其本而祭也繚祭謂剗肺之大本而紾之以

為繚祭大夫以下絕而不繚以上繚而又絕故鄉飲酒稱弗繚右絕未以祭也共祭謂凡尸之食祭皆上佐食工祝共之所以尊之也

辨九擗一曰稽首二曰頓首三曰空首四曰振動五曰吉擗六曰凶擗七曰奇擗八曰褒擗九曰肅擗以享右祭祀

擗音拜下同振讀為振鐸之振奇讀為奇耦之奇紀宜反褒音報右讀為侑

劉氏曰稽首頭至地久而後興頓首至地即興空首至手即興所謂拜手也疏曰稽首拜中最重臣拜

君之禮哀十七年公會齊侯于蒙孟武伯相齊侯稽
首公拜齊人怒孟武伯曰非天子寡君無所稽首又
公如晉孟獻子相公稽首知武子曰天子在而君辱
稽首寡君懼矣君拜臣下當從空首拜其有敬事亦
稽首周誥曰周公拜手稽首成王亦拜手稽首是已
凡自敵者皆從頓首拜 陳氏曰春秋時晉穆嬴抱
太子頓首於趙宣子魯季平子頓首於叔孫則頓首
非施於尊者之禮也 鄭氏曰振動戰栗變動之拜

書曰王動色變吉擗拜而後稽顙凶擗稽顙而後拜
奇拜謂一拜也 陳氏曰儀禮鄉飲鄉射聘禮士相
見禮凡禮之殺者皆一拜是也 鄭氏曰鄭大夫云
褻讀報報拜再拜是也鄭司農云肅拜但俯下手今
時擗是也介者不拜故曰為事故敢肅使者 芸閣
曰禮記肅客謂俯手以揖也 陳氏曰大祝言禮之
重者則先稽首而繼之以頓首空首振動言禮之輕
者則先奇拜而繼之以褻拜肅拜則頓首空首振動

禮之漸殺者也。褻拜肅拜禮之尤殺者也。鄭氏曰：享獻也。謂朝獻饋獻侑勸尸食而拜。

凡大禋祀肆享祭示則執明水火而號祝。隋繫逆牲逆尸令鐘鼓右亦如之。來瞽令皋舞相尸禮既祭令徹大喪始崩以肆鬯。潁尸相飯贊斂徹奠言甸人讀禱付練祥掌國事。國有大故天裁彌祀社稷禱祠大師宜于社造于祖。設軍社類上帝國將有事于四望及軍歸獻于社則前祝大會同造于廟。宜于社過大山川則用事焉。

反行舍奠建邦國先告后土用牲幣禁督逆祀命者頒

祭號于邦國都鄙

裡音因隋許規反右亦當為侑臯讀為卒嗥呼之嗥户高反相息亮反弭

彌爾反什當為祔

鄭氏曰禋祀祭天神也肆享祭宗廟也 王氏曰祭

祭地示也 王介甫曰明水以鑑取水於月明火以

燧取火於日至潔而清明者也號六號祝六祝 鄭

氏曰隋釁謂薦血也凡祭血曰釁王氏曰隋若守祧

所謂藏其隋逆牲則二裸之後王出廟門而逆牲逆

尸則向祭之晨王出廟門而逆尸隋繫逆牲逆尸皆
以鐘鼓為節大祝令之而已右謂尸食而侑之來瞽
舉舞樂師詔之大祝來之也鄭氏曰相尸禮延其
出入詔其坐作也肆鬯所為陳尸設鬯也弭尸以鬯
浴尸大喪言甸人讀禱者言猶語也禱六辭之屬禱
也甸人喪事代王受青災大祝為禱辭語之使以禱
於藉田之神王氏曰凡喪虞卒哭而有祔祭十三
月小祥而練二十五月大祥註疏掌國事辨護之也

彌猶徧也徧祀社稷及諸所禱既則祠之以報焉爾
雅曰起大事動大衆必先有事于社而後出謂之宜
所謂宜于社也司馬法曰將用師乃告于皇天上帝
日月星辰以禱于后土四海神祇山川冢社乃造于
先王所謂造于祖也春秋傳曰君以師行祓社釁鼓
祝奉以從詩曰乃立冢土戎醜攸行所謂設軍社也
詩曰是類是禡爾雅曰此師祭也所謂類上帝也前
祝者王出也歸也將有事於此神大祝居前先以祝

辭告之玉人職有宗祝以黃金勺前馬之禮是謂過
大山川歟用事亦用祭事告行也曾子問曰凡告必
用牲幣反亦如之 陳氏曰釋奠者設薦饌酌奠而
已無迎尸以下事古者釋奠或施於山川或施於廟
社或施於學 劉氏曰禁督逆祀命者謂不稟天子
命令而僭於祀典者禁之頒祭號于邦國都鄙謂彼
得祭者則頒其號也 鄭氏曰號六號也

小祝掌小祭祀將事侯禳禱祠之祝號以祈福祥順豐

年逆時雨寧風旱彌裁兵遠臯疾大祭祀逆盥盛送逆尸沃尸盥贊隋贊徹贊奠凡事佐大祝大喪贊溲設熬置銘及葬設道齋之奠分禱五祀大師掌釁祈號祝有寇戎之事則保郊祀于社凡外内小祭祀小喪紀小會同小軍旅掌事焉

彌讀曰救亡爾反熬五羔反齋音咨

劉氏曰非天地宗廟日月星辰社稷而當祭祀之者皆小祝所掌也候候也候迎順氣之祭禳祭以禳除裁兵也既將事以侯禳則禱以祈之祠以報之而掌

祝號焉

鄭氏曰逆迎也

劉氏曰弭裁兵亦有祭

焉以見王者不得已而用兵也臯疾天降罪罰札瘥其民為政者之所恐懼也故設祭禳以遠之 鄭氏

曰隋尸之祭也奠爵也祭祀奠先徹後反言之者明所佐大祝非一也凡事佐大祝唯大祝所有事也大喪設熬棺既蓋熬黍稷設於其旁所以惑蚍蜉也銘書死者名於旌齋猶送也送道之奠遣奠也 劉氏曰既設道齋之奠又分禱五祀以告王喪之行 鄭

司農曰釁釁鼓也春秋傳曰君以軍行被社釁鼓祝奉以從 王氏曰有寇戎之事則保郊保神壇之在郊者祀于社社不在郊無所事保故祀之而已保郊所以防患祀社所以弭兵也

喪祝

上士二人中士四人下士八人府二人史二人胥四人徒四十人

掌大喪勸防之事及辟令啟及朝御匱乃奠及祖飾棺

乃載遂御及葬御匱出宮乃代及壙說載除飾小喪亦如之掌喪祭祀號王弔則與巫前掌勝國之社稷之祝號以祭祀禱祠焉凡卿大夫之喪掌事而斂飾棺焉

朝直

遙反匱音舊
說吐活反

鄭氏曰勸倡道前引者也防執被備傾戲也 疏曰

天子七月而葬七日殯殯時以槨斂塗其棺及至葬時除斂塗槨所謂辟也 鄭氏曰鄭司農云命啟喪祝命役人開之及朝謂將葬朝於祖考之廟而後行

則喪祝為御匱也奠朝廟奠也及祖謂將葬祖於庭
象牲時出則祖也玄謂祖為行始飾棺設枹池紐之
屬乃載遂御御之者執翹居前卻行為節度及葬御
匱出宮乃代喪祝二人相與更也鄭司農云及壙說
載下棺也除飾去棺飾也鄭氏曰喪祭虞也鄭
司農云王弼則與巫前喪祝與巫以桃茢執戈在王
前也鄭氏曰勝國邑所誅討者社稷者若亳社是
已存之者重神也雜說必立亡國之社何也蓋存

先代之後忌子卯之日寶和乘之器古人如此皆有
深意如詩之有客白馬助祭於廟皆是所警戒修省
之意

甸祝

下士二人府一人史一人徒四人

鄭氏曰甸之言田也田狩之祝

掌四時之田表貉之祝號舍奠于祖廟禰亦如之師甸
致禽于虞中乃屬禽及郊饁獸舍奠于祖禰乃斂禽禡

牲稠馬皆掌其祝號

貉書亦或作禡舍讀為釋屬音燭饁于輒反稠音誅

王氏曰貉師祭也立表以祭故謂之表貉 陳氏曰

古人祭貉於立表之處無壇壝其置甲冑弓矢於神坐之側建稍於神坐之後此師祭也 鄭氏曰田者

習兵之禮故亦禡祭舍奠告將時田若將征伐鄭司農云禡父廟也 王氏曰師田用師以田也 劉氏

曰致禽於虞中乃屬禽及郊饁獸既田則虞人植旗所禡之地屬禽各以其類聚之也乃以所獲之獸饁

饋于郊薦於四方羣兆入以釋奠于祖禰告至也歛禽者擇取三十入于腊人以為乾豆備祀享祭焉禴禱也禱牲禱馬者又因歛禽以祭牲牢之神求其禱碩肥腍也以祭馬祖之神求其六閑四種孔阜奕奕也詩曰吉日維戊既伯既禱其是之謂乎

詛祝

側慮反

下士二人府一人史一人徒四人

鄭氏曰詛祝之使沮敗

掌盟詛類造攻說檜榮之祝號作盟詛之載辭以叙國之信用以質邦國之劑信

鄭氏曰八者之辭皆所以告神明也盟詛主於要誓大事曰盟小事曰詛王氏曰詩曰侯詛侯祝是也類造攻說檜榮大祝之六祈也鄭氏曰載辭為辭而載之於策坎用牲加書于其上也春秋傳曰使祝為載書國謂王之國邦國諸侯之國也劉氏曰謂彼不信而渝盟以負于神也故叙國之信以詛之于

神用以質邦國之劑信質成也劑謂盟載之約也俾
明神降禍於渝者則天下無敢持不信以事其君焉
無敢渝盟以事不信焉

司巫

中士二人府一人史一人胥一人徒十人

鄭氏曰司巫巫官之長 王氏國語曰古者民神不
雜民之精爽不攜貳者而又能齊肅衷正其智能上
下比義其聖能光遠宣朗其明能光照之其聰能聽

徹之如是則神降之在男曰現在女曰巫楚語之言
則是而其謂男覲女巫則誤也 雜說先王之時安
有祝詛之事今特設巫祝一項官十餘員周公似好
巫者是不然正是周公通幽明之理所以安鬼神之
道與堯命重黎相似重黎雖不是巫亦是此意到漢
無此一項官淫祠謠祭無所不有遂有巫蠱之事者
漢如此之叢雜方知周之意思深長

掌羣巫之政令若國大旱則帥巫而舞雩國有大災則

帥巫而造巫恒祭祀則共匱主及道布及菹館凡祭事

守瘞凡喪事掌巫降之禮

匱音丹菹子都反瘞於例反

王氏曰男巫女巫皆不豫為負數司巫則羣巫之長故掌其政令 鄭氏曰雩旱祭也天子於上帝諸侯於上公之神鄭司農云魯僖公欲焚巫尪以其舞雩不得雨也杜子春云帥巫而造巫恒謂司巫帥巫官之屬會聚常處以待命 劉氏曰祭祀則共匱以藏木主 王氏曰主者神所依匱則承主之器也 鄭

氏曰道布者為神所設巾中雷禮曰以功布為道布
屬于几也菹之言藉也祭食有當藉者館所以承菹若
今筐也士虞禮曰葺茅長五寸實于筐巽于西牀
上几祭祀守瘞謂若祭地示有埋牲王者則守之祭
禮畢則去之 劉氏曰人死骨肉歸于土精神陟于天
故喪事則巫掌降其神焉

男巫無數女巫無數其師中士四人府二人史四人胥
四人徒四十人

鄭氏曰巫能制神之處位次王者 王氏曰祝則以辭而通神巫則神所降而依之故巫所以佐祝

男巫掌管祀望衍授號旁招以茅冬堂贈無方無筭春

招弭以除疾病王弔則與祝前

衍讀為延聲之誤也弭亡爾反

王氏曰望祝謂凡祝所祀之神男巫則望而降之

疏曰衍延望延其神 王氏曰授號授祭者以祭號

大祝所辨六號是也 王介甫曰旁招以茅者以茅

招所祀四方之神以茅則與藉之用茅同意 劉氏

曰冬者歲之窮理宜推故以納新也况堂乃人之所
寢而安之者不宜有邪氣有妨春陽之來也不宜有
妖祟以礙吉祥之至也 鄭氏曰冬歲終以禮送不
祥及惡夢皆是也其行必自堂始巫與神通言當東
則東當西則西四方為可也 劉氏曰小大多少莫
不除之故曰無算春陽既來則亦祭以招吉祥以弭
去禍祟則疾病可得而除矣 王氏曰與祝前與喪
祝 王介甫曰弔用巫祝臨死者故也

女巫掌歲時祓除釁浴旱暵則舞雩若王后弔則與祝
前凡邦之大哉歌哭而請暵呼旱反

劉氏曰祓除邪氣又煮香草桃茢以釁浴皆乘陰陽
代謝之時為之今醫方猶爾旱暵帥女巫以舞助陰
氣也鄭氏曰求雨以女巫檀弓曰歲旱繆公召縣
子而問焉曰吾欲暴巫而奚若曰天則不雨而望之
愚婦人無乃已疏乎女巫與女祝前后如王禮也凡
邦之大哉歌哭而請有歌者有哭者異以悲哀感神

靈也

大史下大夫二人上士四人小史中士八人下士十有六人府二人史四人胥四人徒四十人

鄭氏曰大史史官之長 雜說大史掌頒告朔于邦國大祭祀則與執事卜日大師則抱天時又藏六官之所登馮相保章皆占星象則職於大史之下此職蓋述紀國事及星歷卜祝矣惟其職掌紀錄明歷卜故凡郡國計書及天官星歷諸書皆藏於此晉韓宣

子適魯觀書於大史見易象與魯春秋則知象數赴
告之書藏於大史明矣大史惟有此書故得紀成敗
占災異也在周已然則後可知楚昭王時有雲如衆
赤鳥夾日以飛楚子使問周大史對曰其當王身乎
則知太史兼明天象明矣

大史掌建邦之六典以逆邦國之治掌灋以逆官府之
治掌則以逆都鄙之治凡辨灋者攷焉不信者刑之凡
邦國都鄙及萬民之有約劑者藏焉以貳六官六官之

所登若約劑亂則辟瀆不信者刑之

治直吏反攷音
考辟婢亦反

王先生曰大宰建邦之六典小宰司會皆貳之耳而
司書則直掌其書耳至於大史言建邦之六典與大
宰一同以此知大史之權最重蓋古之日官也左傳
曰天子有日官諸侯有日御日官居鄉以底日禮也
日御不失日以授百官于朝是太史雖非鄉而其實
建六典以居六鄉之職 雜說大史掌六典八法八
則宜屬於天官而乃在此何也凡大宰之命令大史

必與焉見於書之顧命國語藉田之事類皆可攷

鄭氏曰逆迎也六典八法八則冢宰所建以治百官
大史又建焉以為王迎受其治也 王氏曰上之制

下以有法也其書皆藏於大史而邦國官府都鄙有
疑者則使之辨於大史而考之不信者是謂非法其
刑之宜矣夫天子制法臣下守法是宜承式而行謹
度而循苟辨而不信事理妄會是奮其私智將至於
亂法矣然則攷其辨法所以伸其在下之情刑其不

信所以杜其好辨之源也 鄭氏曰約劑約盟之載
辭及券書也 王氏曰司約掌邦國及萬民之約劑
若大亂則六官辟藏其不信者殺蓋六官所藏約劑
有登于司約而藏焉者大史又藏焉則以貳六官所
藏及其所登者而參攷之故也約劑所以輔信令又
從而亂之則倍信而奸偽滋起啟其書而正之不信
則奸偽可知刑之所取也司約不信者服墨刑大亂
則殺亦以約其罪之輕重也

正歲年以序事頒之于官府及都鄙頒告朔于邦國閏月詔王居門終月

鄭氏曰中數曰歲朔數曰年中朔不齊正之以閏若今時作歷日矣定四時以次序授民時之事春秋傳曰閏以正時時以作事事以厚生生民之本於是乎在 疏曰一年之內有二十四氣一月二氣皆朔氣在前中氣在後朔氣在晦則後月閏中氣在朔則前月閏節氣有入前月法中氣無入前月法中氣匝則

為歲朔氣匝則為年假令十二月中氣在晦則閏十二月十六日得後正月立春節此即朔數曰年至後年正月一日得啟蟄中此中氣匝此即是中數曰歲王氏曰先王上以因天之時下以成人之事或頒于官府或頒于都鄙王國之事時定矣然後頒告朔于邦國鄭氏曰天子頒朔于諸侯諸侯藏之祖廟至朔朝于廟告而奉行之謂之告朔王氏曰玉藻曰諸侯皮弁聽朔于大廟吉月必朝服而朝則古人重

朔如此而文公不視朔此子貢所以欲去告朔之餼
羊也孔子曰爾愛其羊我愛其禮 劉氏曰明堂路
寢宗廟皆有五室十二堂四門每月視朔聽政于其
堂王居必隨日月之會也閏月無所會之次故居其
月門之左扉 王氏曰先王歷象日月星辰以授人
時朞三百有六旬有六日以閏月定四時成歲其餘
則歸之閏閏非四時之正也而四時不得則不正然
歲時日月盖有常矣而置閏則無常王者體天而立

道於四時春居青陽夏居總章秋居明堂冬居玄堂
其居固有常矣至閏而居門以門者一闔一闢之變
而往來不窮之通也玉藻曰閏月闔門左扉居其中
然則王之居門也豈一朝一夕而已哉凡以應天而
已則不可以不終月終月者所以成其事也所以見
王者消息盈虛與時偕行也

大祭祀與執事卜日戒及宿之日與羣執事讀禮書而
協事祭之日執書以次位常辨事者考焉不信者誅之

大會同朝覲以書協禮事及將幣之日執事以詔王大
師抱天時與大師同車大遷國抱瀆以前大喪執瀆以
泣勸防遣之日讀誄凡喪事攷焉小喪賜謚凡射事飾

中舍筭執其禮事

大師音泰遣奔戰反
舍讀為釋中丁仲反

鄭氏曰大祭祀與執事卜日執事大卜之屬與之者

當視墨 䟽曰戒謂散齊七日宿謂致齊三日羣執

事預祭之官 王氏曰祭事則繁矣具載於禮書之

文故讀禮書則按其文之所載而協其事之所當共

以史主書故也 註疏協合也謂習錄所當共之事
讀禮書而協事恐事有失錯物有不共 王氏曰位
有常處史執禮書以次叙之 疏曰大史掌禮知行
事得失故與人攷焉其抵冒職事者誅之此謂與祭
之人也 王氏曰大會同朝覲將幣所謂廟中將幣
三享之時蓋諸侯將幣有三享之禮而王於受授之
際其儀亦多矣大史執書詔王亦以協其禮事 疏
曰大出師則大史抱天時攄當時占文也與大師瞽

人知天道者同在一車之上共察天文以知吉凶

鄭氏曰史官主知天道故國語曰吾非瞽史焉知天道瞽即大師也 王氏曰太師執同律以聽軍聲以

聲而知天道也太史抱天時以書而知天道也大遷國若盤庚之遷都八史抱司空營國之法先至其所

鄭司農云勸防引六紼 鄭氏曰大喪遣之日讀誄

謂祖廟之庭大奠將行時也人之道終於此累其行而讀之凡喪事攷焉知其得失也小喪賜謚則卿大

夫也凡射飾中含筭鄉射禮曰君國中射則皮豎中於郊則閭中於竟則虎中大夫兕中士鹿中天子之中未聞中所以盛筭也設筭於中以待射時而取之射中則釋之 王氏曰中形為閭虎兕鹿之屬而鑿其背以盛筭明善射多筭則能勝物而制之以為用也執其禮事以禮書皆掌於大史故也 疏曰謂射禮也

小史掌邦國之志奠繫世辨昭穆若有事則詔王之忌

諱大祭祀讀禮瀆史以書叙昭穆之俎簋大喪大賓客

大會同大軍旅佐大史凡國事之用禮瀆者掌其小事

卿大夫之喪賜謚讀誄

故書奠為帝杜子春云帝當為奠奠讀為定書帝亦或作奠

鄭氏曰鄭司農云志謂記也春秋所謂周志國語所

謂鄭書之屬是也史官主書故韓宣子聘于魯觀書

大史氏

釗曰志即國之史冊歟

繫世則帝繫世本之屬是也小

史主定之替矇諷誦之王氏曰父謂之昭子謂之

穆父子相代謂之世世之所出謂之繫奠係世以知

其本所出辨昭穆以知其世序凡此皆有書小史則定而辨之 疏曰先王死日為忌名為諱告王當避此二事 鄭氏曰大祭祀讀禮法者大史與羣執事也史此小史也言讀禮法者小史叙俎簋以為節也大祭祀小史主叙昭穆之俎簋以其主定繫世 王氏曰俎以盛牲簋以盛粢其先後有叙多寡有數 鄭氏曰卿大夫之喪賜謚讀誄亦以大史賜謚為節事相成也

馮相氏

馮音憑相
息亮反

中士二人下士四人府二人史四人徒八人

鄭氏曰馮乘也相視也世登高臺以視天文之次序
掌十有二歲十有二月十有二辰十日二十有八星之
位辨其叙事以會天位冬夏致日春秋致月以辨四時
之叙

疏曰十有二歲者歲謂大歲左行之地行於十二辰
一歲移一辰也十有二月者謂斗柄月建一辰十二

月而周也十有二辰者謂子丑寅卯等也十日者謂甲乙丙丁等也二十有八星者東方角亢氐房心尾箕等皆有位處也 王氏曰辨其叙事若仲春辨秩東作厥民析仲夏辨秩南訛厥民因仲秋辨秩西成厥民夷仲冬辨朔易厥民隩其事各有先後之序

鄭氏曰會天位者合此歲月日辰星宿五者以為時事之候若今歷日大歲在某月某日某甲朔日直某也

王氏曰天位謂星鳥正仲春星火正仲夏星虛正仲秋星昴正仲冬之屬其在天各有所居之位

鄭氏曰冬至日在牽牛景大三尺夏至日在東井景
尺五寸此長短之極極則氣至冬無愆陽夏無伏陰
春分日在婁秋分日在角而月弦於牽牛東井亦以
其景知氣至否春秋冬夏氣皆至則是四時之叙正
矣疏曰春分日在婁月上弦東井圓於角下弦牽
牛秋分日在角月上弦牽牛圓於婁下弦東井
正氏曰此皆以土圭立表以度其至否典瑞云土圭
以致四時日月者此也

保章氏

中士二人下士四人府二人史四人徒八人

鄭氏曰保守也世守天文之變 劉氏曰馮相氏考諸歷數以知天道者也保章氏占於天象以察時變者也

掌天星以志星辰日月之變動以觀天下之遷辨其吉

凶

志古文識

劉氏曰掌天星謂占眡之 鄭氏曰星五星辰日月所會 王氏曰星辰有羸縮日有明晦月有盈虛變

動無常也而天下之妖祥禍福之遷運于下者實隨之矣 劉氏曰志者記載其變動之順逆以知天下之遷易而辨其吉凶之大小淺深以詔於為國者也 以星土辨九州之地所封封域皆有分星以觀妖祥

鄭氏曰星土星所主土也 劉氏曰星土辨九州角

亢氐兗州也房心豫州也尾箕幽州斗牛楊州也虛危青州也室壁并州也奎婁胃徐州也昴畢冀州也觜參益州也井鬼雍州也柳星張三河也翼軫荊州

也彗星客星犯於其宿為災五星當在其宿而盈縮失度亦如之故觀其妖祥而知其土矣 鄭漁仲曰按保章氏以星土辨九州之地所封封域皆有分星如此則分星之說其來尚矣然古之星經至漢散亡保章氏分星不可攷今堪輿所載雖有郡國所入度非古數也鄭氏所引十二次之分本漢地理志大略見於左氏國語然漢費直班固蔡邕魏陳卓李淳風僧一行諸家之說大同小異其為十二州之分星明

矣然嘗疑之青正東玄枵在北雍正西鶉首在其南
揚在東南而星紀在北冀在東北而大梁在正西徐
在東而降婁在西豫與三河居天下之中而大火在
正東鶉火在西南此其最訾者也并在北娵衛在北
荊正南而鶉尾在南北此其正得躔次者也蓋在西南
而實沈在西幽在東北而析木在東究在東而差北
而壽星鄭在東此其得躔度之微差者也又何耶國
語泠州鳩曰昔武王代商歲在鶉火云歲之所在即

我分野賈公彥取為正義曰分星則以諸國始分封之年值歲星所在之辰以為之分次此說非也不知國有分星蓋古人封國之初命以主祀之意昔堯舜封閼伯於商丘主辰則辰為商星商人是因封實沈於大夏主參則參為夏星唐人是因

今晉陽縣即其地

唐後

為晉參為晉星如此則是古人封國命以主祀之意無疑辰為商星參為晉星其來久矣非因封國始有分星使封國之時歲星所在即為分星不應相土因

閼伯晉人因實沈其為封國命祀之意可考矣漢魏諸儒言星土者或以州或以國辰次度數各因當時歷數與歲星遷徙亦非天文之正不可為據又况魏徙大梁則西河合於東井秦拔宜陽則上黨入於輿鬼

井鬼皆秦分野之宿也

方戰國未滅時星象之言見有明驗

今則同在畿甸之內或者又執漢書地理以求之則非也善乎唐一行之言十二次也惟以雲漢始終言之雲漢江河之氣也認江河脉絡於兩戒識斗羅升

沉於四維下參以古漢郡國其於區處分野之所在
如指諸掌蓋星有氣耳雲漢也北斗也五星也無非
是氣也一行之學其深矣乎

以十有二歲之相觀天下之妖祥

相息亮反

鄭氏曰歲謂太歲歲星與日同次之月斗所建之辰
也歲星為陽右行於天大歲為陰左行於地十二歲
而小周越得歲而吳伐之必受其凶之屬 王氏曰
分星經星也故有所主之封域歲星緯星也異於分

主則無常主矣占其所見之相有逆順盈縮伏見進退之不同而妖祥著於天下矣

以五雲之物辨吉山水旱降豐荒之祲象

疏曰物色也此五色之雲以辨吉凶也 鄭氏曰鄭

司農云以二至二分觀雲色青為蟲白為喪赤為兵荒黑為水黃為豐故春秋傳曰凡分至啟閉必書雲物為備故也 王氏曰降豐荒之祲象蓋其說於國使民知之焉故謂之降事未至而使之備患未至而

使之防先王所以仁民可謂厚矣

以十有二風察天地之和命乖別之妖祥

鄭氏曰十二風者十二辰皆有風吹其律以知和否
春秋楚師伐鄭師曠曰吾驟歌北風又歌南風南風
不競多死聲楚必無功是時楚師多凍其命乖別審
矣 王氏曰十有二風風之生於十二辰之位者也
蓋天地六氣合以生風艮為條風震為明庶風巽為
清明風離為景風坤為涼風兌為闔闔風乾為不周

風坎為廣莫風八風本乎八卦傳曰舞以行八風謂此也四維之風兼於其月故艮為條風而立春亦曰條風巽為清明風而立夏亦曰清明風坤為涼風而立秋亦曰涼風乾為不周風而立冬亦曰不周風故八風變而言之又謂十二風也風生於天地之和氣以風察天地之和和則無事矣不和則命乖別之妖祥以告人而使知所備焉乖則異而不同別則離而不合乖別者不和之所致也然乖別在人而妖祥先

見於風則人與天地同流通萬物一氣故也

凡此五物者以詔救政訪序事

王氏曰日月星辰之變動也星土辨九州也十有二
歲也五雲之物也十有二風也即所謂五物 劉氏
曰凡保章之職用此五物以測陰陽之和否察天地
之逆順以詔王反躬務德以修救政也 王介甫曰
詔以詔上訪以訪下救政凶荒乖別之政序事救政
之事所當先後緩急 王氏曰夫惟天有以示人惟

人有以奉天修其誠足以應其情正厥事足以格其變此聖人和同天人之際而使之無間者也

內史

中大夫一人下大夫二人上士四人中士八人下士十有六人府四人史八人胥四人徒四十人

陳彥羣博議成周建官之法內史掌王八柄之法以詔王治凡命諸侯及孤卿大夫則策命之內史掌書外令御史掌贊書釋者以為王有命以書致之則贊

為辭若今尚書大抵治黜陟未嘗掌文書至漢時凡有制誥則以尚書掌之武帝與淮南王爭能每為報書及賜賞召司馬相如等視草廼遣自後從事文章改尚書令為中書謂者東漢有蘭臺述作之事唐制待詔翰林院百工校藝皆居焉其後尊重文章而有翰林學士之設親近人主權重丞相推冊皇后太子翰林則作制詔追國朝翰林學士知內制知制誥知外制

掌王之八枋之灋以詔王治一曰爵二曰祿三曰廢四
曰置五曰殺六曰生七曰予八曰奪執國灋及國令之
貳以攷政事以逆會計掌叙事之灋受納訪以詔王聽
治凡命諸侯及孤卿大夫則策命之凡四方之事書內
史讀之王制祿則贊為之以方出之賞賜亦如之內史
掌書王命遂貳之

枋本又作
柄兵用反

鄭氏曰八柄大宰既以詔王內史又居中貳之劉
氏曰聖人獨執以制天下治者八柄也大宰掌八柄

以詔王馭 臣者不敢擅其重輕也內史掌其法以
詔王治者又以察其中否也夫八柄雖出於王又非
大宰所敢擅也而內史猶以法令攷之者有失其中
則弗書其命也期協于中然後方策行焉蓋周之所
以獨求其治者設官執法內外相維以制其失而惟
中之求也雖貴為天子富有八柄亦不得作好作惡
以遂其私而況其下者乎 王介甫曰大宰八柄之
序先慶賞而後刑威於慶賞則先重而後輕於刑威

則先輕而後重勸賞畏刑之意至於內史則慶賞刑
威雜而不知其孰先主於守法而不預其道揆之意
也 王氏曰大宰以八柄詔王馭群臣者明道揆於
上而所掌者非特法而已內史掌王八枋之法以詔
王治者謹法守於下而道揆有不與也謂之八枋之
法則所掌者法而已謂之王之八枋則法當自王出
故也 鄭氏曰國法六典八法八則也 疏曰凡國
之政令亦掌其貳以考其政事逆其計會而知其得

失善惡而誅賞也 王介甫曰叙事事治先後也納
言於上訪訪事於下 雜說有事斯有法軍旅之事
則有軍旅之法田役之事則有田役之法以至祭祀
喪紀會同之事莫不皆然內史所掌叙事之法者此
又法有便於民者先王不恃法以為便任已以為明
也故必納訪於民而使內史受焉其所不便者革之
損益必利於民然後可以治天下故先受納訪然後
詔王聽治也 鄭氏曰策謂以簡策書王命也王命

內史叔興父策命晉侯為侯伯其文曰王謂叔父敬服王命以綏四國糾逖王慝晉侯三辭從命受策以出王先生曰書之洛誥逸祝冊惟告周公其後是命魯公也畢命曰康王命作冊畢是命畢公也左氏曰王命內史叔興父策命晉侯為侯伯是命晉文也鄭氏曰事書若今尚書入省事

某氏曰凡四方之事書無所不具命內史

以讀之者豈徒然哉蓋格物窮理之端而參之朝夕事為之際此傳說所謂王人求多聞時惟建事者也使人主默識於心日與事接於未形之前親切審訂無所偏蔽然後見之於制祿則贊為之故斟酌損益

無杆格之患以方出之則輕審明審無偏差不審之處其於賞賜無常固出於人主一時之獨見然所謂贊為者未嘗不與也不然大宰總百官均四海夫豈不能任此責哉蓋內史之官朝夕啟沃其君之心伴見其所當然不可有所奪移也於此當知其深意之所在矣

鄭氏曰贊為之為

之辭也鄭司農云以方出之以方版書而出之上農夫食九人其次食八人其次食七人其次食六人下農夫食五人庶人在官者其祿以是為差諸侯之下士視上農夫祿足以代其耕也中士倍下士上士倍中士下大夫倍上士鄉四大夫祿君十鄉祿玄謂

王制曰王之三公視公侯卿視伯大夫視子男元士視
附庸掌書王命遂貳之副寫藏之 某氏曰謹王命

也

外史

上士四人中士八人下士十有六人胥二人徒二十人

掌書外令掌四方之志掌三皇五帝之書掌達書名于

四方若以書使于四方則書其令

使所吏反

雜說內史掌書王命內制今學士也外史掌書外令

外制今舍人也 鄭氏曰外令王令下畿外也志記

也四方之志若晉之乘楚之檮杌魯之春秋三皇五

帝之書所謂三墳五典 王氏曰掌四方之志則下

以和風俗之所向三皇五帝之書則上以考古昔之

所行

劉氏曰孔安國曰伏羲氏之王天下也始畫八卦造書契以代結繩之政由是文籍生焉伏羲

神農黃帝之書謂之三墳言大道也少昊顓頊高辛

唐虞之書謂之五典言常道也九州之志謂之九丘

丘聚也言九州所有土地所生風氣所宜皆聚此書也則四方之志其九丘之類歟掌之者以待王之稽

古焉達其名于四方所以廣先王之道也

鄭氏曰書名若堯典禹貢達

此名使知之 王氏曰此所以一道德而同風俗也
又安有異政殊俗之患 鄭氏曰以書使于四方則
書其令書王令以授使者 王氏曰外史掌外令故
也

御史

中士八人下士十有六人其史百有二十人府四人胥
四人徒四十人

註疏御猶侍也其史百有二十人以掌贊書人多也

故其史職亦在府上 東萊曰御史之名見於周官
以中士下士為之特小臣之傳命令者耳至於戰國
其職蓋親故獻書多云獻書于大王御史澠池之會
各命御史書事而淳于髡亦曰御史在前執法在後
是掌記事糾察之任也至秦人主自親事以操御臣
下侍御僕從其勢益重而御史大夫遂與丞相分權
矣

掌邦國都鄙及萬民之治令以贊冢宰凡治者受灋令

馬掌贊書凡數從政者

治直吏反
數所主反

劉氏曰凡曰治者皆出於治典而冢宰頒之邦國都
鄙者也故治六官則有六典治官府則有八法治都
鄙則有八則馭群吏則有八柄馭萬民則有八統任
萬民則有九職斂財賦則有九賦節財用則有九式
致國用則有九貢皆所以為治之本而出於大宰者

也御史則以治令攷察其從違而糾繩之必如其法

所以贊冢宰也

王氏曰此即冢宰所謂六典治邦國
八法治都鄙官成待萬民之治御史

掌其治
令焉

王氏曰法令書之於御史凡治者從而受之鄭氏曰王有命當以書致之則贊為辭若今尚書作詔文凡數從政者自公卿以下至胥徒凡數見在空缺者王介甫曰若令御史掌班簿

巾車

下大夫二人上士四人中士八人下士十有六人府四人史八人工百人胥五人徒五十人

鄭氏曰巾車車官之長王氏曰巾設飾之物車人

為車則於冬官百工之事而中車之所掌則設飾為主也 王先生曰有車必有馬有馬必有僕有僕必有右王之五路其馬六其僕五其右三校人之職辨六馬之屬種馬戎馬齊馬道馬駑馬駟馬此六馬也大馭玉路之僕戎路草路之僕齊僕金路之僕道僕為象路之僕田僕為木路之僕此僕五也戎右草路木路之右齊右為玉路金路之右道右為象路之右此右三也然曰馬曰僕曰右皆見於夏官而五路獨

見於春官蓋春官所以為禮夏官所以為兵車旗之物屬於禮而馬與僕右屬於兵所以重其事也

掌公車之政令辨其用與其旗物而等叙之以治其出入王之五路一曰玉路錫樊纓十有再就建大常十有二旂以祀金路鉤樊纓九就建大旂以賓同姓以封象路朱樊纓七就建大赤以朝異姓以封革路龍勒條纓五就建大白以即戎以封四衛木路前樊鵠纓建大麾以田以封蕃國

錫音陽樊讀如鞞帶之鞞步干反旂音留旂其依反朝直遙反龍如字又音龍

條讀為條它刀反前讀為緇翦之
翦子踐反鵠戶篤反又或為結

王氏曰自王之五路至庶人乘役車以上皆典於公而非私車也故謂之公車辨其用謂玉路以祀之類也辨其旗物謂玉路建太常之類也等其上下叙其先後以治其出入是故有先路綴路次路之名焉

陳氏曰路大也 劉氏曰王之寢曰路寢王之門曰路門王之馬曰路馬王之車曰路車皆大之稱無所擬倫而曰路焉 鄭氏曰玉路以玉飾諸末 王先

生曰明堂位曰乘路周輅玉路一名乘路 鄭氏曰
錫馬面當盧刻金為之 王氏曰詩所謂鈞膺鏤錫
是已動則有聲所以養王聰也 鄭氏曰樊馬大帶
也纓馬鞍也 王氏曰纓所以羈馬也樊與纓皆以
五采飾之所以養王明也 陳氏曰五采一帀為一
就與圭纁冕旒之就同 鄭氏曰大常九旗之畫日
月者旂則屬焉 王氏曰玉德之美也王所乘玉路
備德之美然後可以格神而享之故玉路王乘之以

祀 劉氏曰玉以比德也王祭祀乘玉路者欲王之
奉祭祀雖在道途不敢跬步忘乎其德也 鄭氏曰
金路以金飾諸末鉤婁額之鉤也金路無錫有鉤亦
以金為之其樊及纓以五采屬飾之而九成大旂九
旗之畫交龍者 王先生曰明堂位曰有虞氏之旂
鄭氏曰以賓以會同賓客 王氏曰同姓以封以封
同姓諸侯 王先生曰按定公六年莒弘曰武王分
魯公以大路大旂杜氏曰大路金路也大路一名齊

車 鄭氏曰象路以象飾諸末 王先生曰象路一曰

道車司常所載是已 鄭氏曰無鈎以朱飾勒而已其

樊及纓以五采罽飾之而七成大赤九旗之通帛以

朝日視朝也異姓王甥舅也革路鞅以革而漆之無

它飾龍馭也以白黑飾韋雜色為勒條

讀為條
它乃反

其樊

及纓以條絲飾之而五成不言樊字蓋脫爾以此言

條知玉路金路象路飾樊纓皆不用金玉象矣 王

先生曰革路一名戎車又曰兵車戎僕所載是已

鄭氏曰大白商之旗猶周大赤蓋象正色也即戎謂
兵事四衛四方諸侯守衛者蠻服以內也 劉氏曰
五路莫非木而成之者而此無王金象革之飾直漆
之而已示其質樸也 王先生曰木路一名旂車司
常所載是已 鄭氏曰翦淺黑也木路無龍勒以淺
黑飾革為樊鵠色飾帑為纓不言就數飾與革路同
大麾不在九旗中以正色言之則黑夏后氏所建田
四時田獵蕃服謂夷服鎮服蕃服 王介甫曰大常

象天有日月焉大旂象春有交龍焉大赤象夏正南方之物也大白象秋正西方之物也大麾象冬正北方之物也

王后之五路重翟錫面朱總厭翟勒面績總安車彫面
鷩總皆有容蓋翟車具面組總有握輦車組輓有翟羽

蓋

重直龍反厭於涉反績戶對反鷩鳥兮反握鳥學反輦本作運組音祖輓音晚翟所甲反

劉氏曰重翟用雉之羽或搖或輦重二以飾車蔽錫
面同玉路也朱總朱以為勒鄭氏曰重翟后從王

祭祀所乘也

劉氏曰厭翟鱗次翟羽相厭為飾而

不重之也

鄭氏曰厭翟后從王賓饗諸侯所乘也

勒面謂以如玉龍勒之韋為當面飾也續畫文也詩

碩人曰翟茀以朝謂諸侯夫人始來乘翟茀之車以

朝見於君盛之也翟茀蓋厭翟也然則王后始來乘

重翟乎安車坐乘車凡婦人車皆坐乘 陳氏曰此

王后五路皆坐乘則皆安車也特於無翳無蔽者命

之曰安車以其不飾之以羽與四者異 王氏曰彫

總則彫之而已不飾 鄭氏曰鷺青黑色以繒為之
皆有容蓋則重翟厭翟謂蔽也安車無蔽后朝見於
王所乘 王氏曰容車帷也蓋車蓋也 鄭氏曰翟
車不重不厭以翟飾車側爾具面具飾勒之當面也
王氏曰組總以織組為總也 鄭氏曰有握則無蓋
矣后所乘以出桑輦車不言飾后居宮從容所乘但
漆之而已為輅輪人輓之以行有翼所以禦風塵以
羽作小蓋為蔽日也 陳氏曰祭祀賓客行禮也故

有容蓋出桑適遠也故有幄朝王不必蔽翳宮中不必蔽幄也

王之喪車五乘木車蒲蔽大禭尾纛䟽飾小服皆䟽素

車禁蔽大禭素飾小服皆素藻車藻蔽鹿淺禭革飾驪

車荏蔽然禭髣飾漆車藩蔽豻禭雀飾

乘絕證反禭莫歷反藻音羔故

書䟽為搢服讀為服禁讀為纘扶云反藻音藻故書驪作龍杜云龍讀為驪荏音丸髣音求反故書作軟

豻五旦反

鄭氏曰木車不漆者蔽車旁禦風塵者蒲蔽以蒲為

蔽 疏曰古者男子立乘須馮軾軾上須皮覆之

鄭氏曰大祺以白犬皮為祺也尾橐又以其尾為戈
戟之 疏曰飾麕布飾二物之側小服刀劍短兵之
衣此始遭喪所乘備姦臣也書曰以虎賁百人逆子
釗亦為備焉素車以白土堊車也蘋蔽蘋麻以為蔽
其祺服以素繒為緣此卒哭所乘藻車藻水草蒼色
以蒼土堊車以蒼繒為蔽鹿淺祺以鹿夏皮為覆苓
又以所治去毛者緣之此既練所乘駟車邊側有漆

飾也翟細葦席也以為蔽者漆則成藩即去也然果然獸名髹赤多黑少之色韋也此大祥所乘漆車黑車也藩今時小車藩漆席以為之紆胡犬雀黑多赤少之色韋也此禫所乘

服車五乘孤乘夏篆卿乘夏縵大夫乘墨車士乘棧車

庶人乘役車

篆讀為主
縵莫干反
棧才產反

鄭氏曰服車服事者之車夏篆五采畫轂約也夏縵亦五采畫無瑑爾杜預曰左傳云山崩川竭君為

之不舉降服乘纁纁車無文也 陳氏曰墨車墨漆

之而不畫棧車素之而不漆詩云有棧之車行彼周

道 王先生曰士昏禮曰主人乘墨車昏禮攝盛也

鄭氏曰役車方箱可載任器以共役 王氏曰考工

記曰棧車欲弇飾車欲侈墨車以上皆飾車也棧車

無飾役車鄭氏謂載任器以共役然謂之乘則非特

載任器而已夫貴而孤鄉賤而庶人率皆參稽其德

位之隆殺以為之制度以立之差等則德不稱焉有

所不用也位不稱焉有所不用也上不得以偪下下
不得以僭上雖有桀驁者不敢干焉雖有覬覦者不
敢越焉是乃所以正名分之大而杜竊擬之端歟

劉氏曰諸侯之孤卿猶此孤卿也大夫士猶此大夫
士也上得以兼下則孤備服車五乘矣其貳車則各
從其命數是以天子之孤貳車六乘大夫四上士三
中士二下士一乘也所建旂旂亦如貳車之數焉

凡良車散車不在等者其用無常凡車之出入歲終則

會之凡賜闕之毀折入齋于職幣大喪飾遣車遂廢之行之及葬執蓋從車持旌及墓噉啟闢陳車小喪共匱路與其飾歲時更續共其弊車大祭祀鳴鈴以應雞人散素早反齋讀為資遣弃戰反從才用反幣婢世反故書鈴或幹杜子云當為鈴

鄭氏曰精制曰良麓制曰散 王介甫曰自役車以

上皆在等者其用固有常矣餘或良或散唯所用

疏曰出出給官用入用罷歸官至歲終則總會計完敗多少以入計會也 王氏曰凡賜缺之者凡賜無

常唯上所用故缺而不會至尊不可以有司之法制
之也 鄭氏曰杜云資財也乘官車毀折者入財以
償繕治之直也 疏曰入於職幣職幣主受給官物
所用之餘也職幣既得此物還與冬官繕治之 鄭
氏曰遣車一曰鸞車廡之陳駕之 王介甫曰廡之於
宮行之以道墓 鄭氏曰執蓋從車隨柩路也持蓋
與旌者王平生時車建旌雨則有蓋今廡車無蓋執
而隨之象生時有也所執者銘旌也關墓門也車貳

車也小喪共柩路載柩車也飾棺飾也歲終更續更易其匱也續續其不任用者也共其弊車歸其故弊車入于車人材或有中用也雞人主呼旦鳴鈴以和之聲且警衆也必使鳴鈴車有和鸞相應和之象

典路

中士二人下士四人府二人史二人胥二人徒二十人掌王及后之五路辨其名物與其用說若有大祭祀則出路贊駕說大喪大賓客亦如之凡會同軍旅弔於四

方以路從

說書銳反
從才用反

王氏曰王與后之車特設典路之官以掌之而其職特嚴事至尊故也用謂出也說謂止也鄭氏曰大祭出路出玉路王當乘之贊駕說贊僕與趣馬也

王氏曰傳曰日出而駕日中而說此駕說之辨也

鄭氏曰大喪出路當陳之書顧命曰成王崩康王既陳先王寶器又曰大路在賓階面綴路在阼階面先路在左塾之前次路在右塾之前王氏曰大賓客

出金路以路從者王乘一路而典路以其餘路從行
非特衛至尊亦以華國也

車僕

中士二人下士四人府二人史二人胥二人徒二十人
掌戎路之革廣車之革闕車之革革車之革輕車之革
凡師共革車各以其革會同亦如之大喪廐革車大射

共三乏

萃七內反廣苦曠反故書萃作平杜云萃車當為耕其字當為革薄經反輕遣政反

鄭氏曰萃猶副也此五者皆兵車所謂五戎也王

氏曰戎路革路也革路以即戎故又謂之戎路 鄭

氏曰戎路王在軍所乘廣路橫陳之車闕車所用布
缺之車革猶屏也所用對敵自蔽隱之車也輕車所
用馳敵致師之車 陳氏曰襄十四年晉欒鍼曰吾

有二位於戎路僖二十八年晉侯獻楚俘于王賜以
戎路之服莊九年乾時之戰公喪戎路桓八年漢淮
之軍楚鬬丹獲戎車皆其君之所乘者也襄二十三
年齊伐衛有先驅申驅貳廣啟肱大殿襄十一年鄭

人啟晉侯有廣車駢車宣十二年晉楚之戰有左右
廣襄二十四年鄭射犬御廣而行定四年史皇乘廣
而死所謂廣車也邲之戰楚子使潘黨帥游缺四十
乘從唐侯為左拒所謂游車補缺也鄭氏曰孫子
八陳有革車之陳又曰駢車千乘陳氏曰詩曰輶
車鸞鑣爾雅云輶輕也王氏曰此五車皆戎車也
凡師共革車則戎車皆以革鞅之鄭氏曰革各從
其元雜說車戰之法每車甲士三人步卒七十二

人二十四人居前左右各二十四人居前者戰左右者挾轅常相更番後又二十五人為一隊去車二十五步所謂炊家子守衣裝廩養樵汲者是也行則以車為衛居則以車為營一車一間又有倅車孫子曰萃車千駟輕車千乘帶甲十萬謂倅車也車戰之法則為不可敗計有倅車者萬一或敗免致倉皇無備後人自不能車戰切不可言車戰不可用如宋武帝車戰之法極好馬隆亦用車戰又誰敗它唐太宗李

衛公最喜論車戰房琯陳濤之敗乃是車無騎牛與馬雜用之何緣不敗 鄭氏曰巡守及兵車之會則王乘戎路乘車之會王雖乘金路猶共以從不失備也大喪廋革車言革車則遣車非特戎路而廣闕革輕皆在焉 疏曰乏一名容射人所謂三獲三容是也

司常

中士二人下士四人府二人史二人胥四人徒四十人

鄭氏曰司常主王旌旗 王氏曰掌九旗之官而名之曰司常者日月為常王所建也而九旗莫尊焉謂之司常主尊者言之也

掌九旗之物名各有屬以待國事日月為常交龍為旂通帛為旌雜帛為物熊虎為旗鳥隼為旟龜蛇為旐全

羽為旟析羽為旐

旐之然反隼息允反旗音餘旐音兆旐音遂

王氏曰旗之名則常旂旌物之屬旗之物則通帛雜帛之屬各有屬則自王以下各有屬建旗則使其屬

視而從焉待國事謂國有師田祭祀賓客之事 陳

氏曰郊特牲曰旂十有二旒龍章而設日月象天也

左氏曰三辰旂旗昭其明也即太常也 王氏曰一

龍升一龍降以為交龍 陳氏曰龍有升降升白龍

于緣則青者降矣白陰而升青陽而降此交泰之道

也詩曰龍旂陽陽龍旂承祀龍旂十乘淑旂綏章左

傳曰分魯以大路大旂樂記曰龍旂九旒天子之旌

也 劉氏曰通帛為旌絳帛通幅為之周人尚赤所

謂大赤也 鄭氏曰通帛從周正色無飾 陳氏曰
爾雅曰因章曰旃左氏曰亡大旆之左旃又曰分康
叔以少帛績茂旃旌 劉氏曰雜帛者外飾為白殷
之正色所謂大白也中幅以絳 王氏曰熊以其毅
虎以其猛鳥以其速隼以摯 劉氏曰龜取其靈而
有知蛇取其敏而有勇 陳氏曰鄭有蟲弧晉有蠶
旗所謂旗之屬而非古制也詩云子子干旗所謂旗
也詩云建此旐矣又建旐設旐所謂旐也 鄭氏曰

全羽析羽皆五采繫之於旛旌之上所謂註旌於干首也凡九旗之帛皆用絳

及國之大閱贊司馬頒旗物王建大常諸侯建旂孤卿建旌大夫士建物師都建旗州里建旟縣鄙建旐道車載旛旂車載旌皆畫其象焉官府各象其事州里各象其名家各象其號

王氏曰掌九旗之物名以待國事者司常也大閱則大教武事而司馬主兵故於大閱而頒旗物則以司

馬為主而司常則贊之而已 鄭氏曰王畫日月象

天明也 王氏曰日月為常天道之運也易曰見龍

在田君德也諸侯在國則有君道在朝則有臣道故

龍一升一降乃不為亢所以為交龍之象 陳氏曰

璫為大赤故孤卿建之物為少帛故大夫士建之

王先生曰凡無所將者則無所畫通帛雜帛是也大

閱之時孤卿大夫士與夫六卿六遂三等采地之大

夫咸在師都將三等采地都邑之兵

陳氏曰師都孤卿也 藍田呂

氏曰師都則族師州里則鄴長縣鄙則三州里將六縣師知之者以此職皆有旗鼓之文

鄉之兵縣鄙將六遂之兵此師都所以有熊虎之旗州里所以有鳥隼之旗縣鄙所以有龜蛇之旐孤卿大夫士則從王耳此所以建旌物也及觀大司馬中秋教治兵辨旗物之用言王載大常諸侯載旂與司常同其它軍吏載旗而此則師都建之師都載旌而此則孤卿建之鄉遂載物而此則大夫士載之郊野載旐而此則縣鄙建之百官載旗而此則州里建之

載旒載旌則見於此而司馬又皆缺焉抑治兵大閱
其禮各異歟其意安在 劉氏曰熊旂六旂鳥旗七
旂龜旒四旂皆王者所建也其旂與杠長短等於太
常若人臣建之則各從其命數而為之等降焉 鄭
氏曰道車象路也王以燕出入旂車木路也王以田
以鄙大閱王乘戎路建大常玉路金路不出全羽析
羽象其文德也 疏曰上之九旗旗之大者也自皆
畫其象之後言旌旒之細者也 王氏曰皆畫其象

馬皆畫之旗 鄭氏曰事名號者徽識所以題別群
臣樹之於位朝各就焉覲禮曰公侯伯子男皆就其
旂而立此其類也在國以表朝位在軍又象其制而
為之或謂之事或謂之名或謂之號異內外也三者
旌旗之細也綴於膊上 疏曰詩六月云織文鳥章
白旂央央箋云織徽識也昭二十一年宋厨人濮曰
揚徽者公徒也是名徽也 鄭氏曰官府各象其事
則畫六官所掌之事州里各象其名則畫州里之官

名家各象其號則畫其家邑之名號 王先生曰此
即司馬所謂號名是也

凡祭祀各建其旗會同賓客亦如之置旌門大喪共銘
旌建廋車之旌及葬亦如之凡軍事建旌旗及致民置
旗弊之甸亦如之凡射共獲旌歲時共更旌

弊婢世反
甸音田

疏曰凡祭祀各建其旗王乘玉路建太常諸侯則旂
孤卿則旌大夫士則物 鄭氏曰賓客朝覲宗遇王
乘金路巡守兵車之會王乘戎路皆建其太常 王

先生曰掌舍職曰為帷宮設旌門設之者掌舍而共其旌以為門者司常也 鄭氏曰銘旌王則大常也士喪禮曰為銘各以其物 疏曰建廠車之旌謂以廠旌建於遣車之上此謂在廟陳時也及葬亦如之入壙亦建之也 鄭氏曰凡軍事建旌旗及致民置旗弊之者始置旗以致民民至仆之誅後至者 王氏曰服不氏以旌居乏而待獲此獲旌也司常共之 疏曰歲時共更旌謂受官旗用之者歲時來換易則

取舊予新也

都宗人

上士二人中士四人府二人史四人胥四人徒四十人
王氏曰宗典祀者也掌都祭祀之禮謂之都宗人則
以公卿王子弟所食采地謂之大都小都故也掌家
祭祀之禮謂之家宗人則以大夫所食采地謂之家
邑故也芸閣呂氏曰古之典祀者皆以宗名之故伯
夷作秩宗周官有宗伯下及都家皆有宗人宗者廟

也禮始於親親之法非廟不統所以別姓收族無一
不出於祖廟不主乎祖宗

掌都祭祀之禮凡都祭祀致福于國正都禮與其服若
有寇戎之事則保羣神之壝國有大故則令禱祠既祭

反命于國

壝維
癸反

王氏曰夫節莫差於僭僭莫差於祭故季氏之旅泰
山而孔子病之此都家宗人所以皆先之以祭祀之
禮蓋在所尤謹也祭祀之致福于國歸王以其福也

黃氏曰都家之邑有社稷焉物之所資以生者也有
五祀焉人之所待以安者也有先君焉國之所因以
立者也有名山大川之在其地者有因國之在其地
而無主后者都家之治以貴得民此族實陰相之者
不可忘也先王為之頒祀以馭其神為之宗人以典
其祀而或賜之禽焉王以不與其祭而重之也夫為
之頒祀以馭其神為之宗人以典其祀則都家祭祀
之禮惟王所議神之所享惟王所賜其福安得而不

致哉而况子弟之親公卿大夫之密邇壽王以其福
固其願也祭僕展而受之膳夫受而膳之示王享其
所致而已 鄭氏曰正都禮與其服禁督其違失者

王氏曰夫禮所以定尊卑別貴賤辨親疎而明分守
也而僭亂之生其微常起於衣服之間則正都禮與
其服者又不可緩也 鄭氏曰服謂衣
服車旗宮室 鄭氏曰保羣

神之壝守山川丘陵墳衍之壇域也令令都內之有
司也祭謂報賽也反命反白王也 王氏曰祀所以

馭其神必命之祭然後祭則祭之命上所出既祭反命于國則逆祀命者蓋無有矣

家宗人

如都宗人之數

掌家祭祀之禮凡祭祀致福國有大故則令禱祀反命祭亦如之掌家禮與其衣服宮室車旗之禁令

鄭氏曰大夫采地之所祀與都同若先王之子孫亦有祖廟以王命令禱祠歸白王於獲福又以王命令

祭之還又反命 䟽曰都宗人若有寇戎之事則保
羣臣之墳者據王所命祀者而言則此家宗人亦有
王所命祀者家宗人亦保可知矣 王氏曰都宗人
家宗人言或詳或略皆互見

凡以神仕者

無數以其藝為貴賤之等

劉氏曰神仕謂明神理而仕者 王氏曰藝即掌三
辰之法以下精於其藝者為之

掌三辰之灋以猶鬼神示之居辨其名物以冬至致天神人鬼以夏日至致地示物魁以禴國之凶荒民之

札喪

鬼眉秋反
檜胡對反

王氏曰三辰之法謂日月星辰之次舍其推之皆有法也猶圖也天神人鬼地示之居必圖之以三辰之法者蓋三辰者陰陽之精也鬼神示雖幽而形然皆麗乎陰陽而由陰陽之精以推之則其居可圖也昔神降于莘問內史過日以其物享焉其至之日亦其

物也是亦以三辰之法猶之辨其所命之名所色之物此所以知鬼神之情狀也 鄭氏曰國語曰在男曰覲在女曰巫是以所制神之處位次主而為之牲器時服巫既知神如此又能居以天法是以聖人用之今之巫祝既闇其義何明之見何法之行正神不降惑於邪厲苟貪貨食遂誣人神令此道滅痛矣又曰天神陽也地物陰也陽氣升而祭鬼神陰氣升而祭地示物鬼致人鬼於祖廟致物鬼於壇墠百物

之神曰魁 王氏曰禮國凶荒民札喪夫禱祈梗禴
人情不能免先王因人情而為之典禮凡以與民吉
凶同患之意 王先生曰按楚語昭王問於觀射父
而及重黎絕地天通之事蓋古者巫祝之任甚重射
父所對詳矣 楊鼎卿曰按禮記以三辰言之孟春
日在營室昏參中旦尾中孟夏日在畢昏翼中旦婺女
中孟秋日在翼昏建星中旦畢中孟冬日在尾昏危
中旦七星中以猶鬼神示之居故春則其帝大皞其

神勾芒其祀戶夏則其帝炎帝其神祝融其祀竈秋
則其帝少皞其神蓐收其祀門冬則其帝顓頊其神
玄冥其祀行以辰猶居非特如此言其帝位則可類
推矣



周禮集說卷五